

# selangorkini

PERCUMA

PP 19570/07/2020 (035196)

EDISI 16 - 22 NOVEMBER 2023

www.selangorkini.my

## Langkah baharu tingkat hasil negeri

Jangka pertambahan RM100 juta diraih pada tahun depan melalui perkongsian dividen anak syarikat dengan anggaran hasil RM40 juta dan semakan fi pejabat tanah (RM50 juta) serta caruman parit (RM10 juta)

MUKA 2

### Permohonan bantuan naik tiga kali ganda

Kenaikan nilai baucar Jom Shopping dorong permohonan Skim Mesra Usia Emas (SMUE) meningkat lebih tiga kali ganda kepada 110,566 individu, setakat Oktober, berbanding 29,777 sepanjang tahun lepas

MUKA 3



Dato' Menteri Besar Dato' Seri Amirudin Shari melawat mangsa banjir di pusat pemindahan sementara di Sekolah Menengah Kebangsaan Dengkil, Sepang pada 9 November 2023. Foto HAFIZ OTHMAN

►BERITA MUKA 3 & 6

## pancawarna

### Bangkit kesedaran pembantaian Zionis

MB ulas isu perang dalam Belanjawan Negeri 2024



11

### Hikmah Tuhan jadikan pelbagai kaum

Fitrah manusia diciptakan berbeza upaya akal, tabiat dan budaya



15

### Ternak 100 tan ikan keli, tilapia

Hasil ketekunan sejak 2007, Hafiz dinobat Ikon Agro Selangor 2022



9

## Kunjungi pameran Anak-anak Sidek

**SHAH ALAM** - Pameran Anak-anak Sidek berlangsung selama enam bulan sejak 1 November di Muzium Sultan Alam Shah di sini, kata EXCO Kebudayaan dan Warisan Borhan Aman Shah.

Katanya, pameran percuma itu memberi peluang orang ramai khususnya peminat badminton melihat koleksi piala, pingat, gambar dan barang milik anak Allahyarham Datuk Sidek Abdullah Kamar.

"Perbadanan Adat Melayu dan Warisan Negeri Selangor mengadakan perjumpaan dengan Datuk Misbun dan Datuk Seri Jailani. Mereka setuju dan sudah serah bantangan kepada kita.

"Persetujuan melibatkan tiga perkara iaitu pinjaman, serahan sementara dan hadiah (sumbangan kepada muzium)," katanya baru-baru ini.

## Bentuk warga kerja berintegriti tinggi

**SHAH ALAM** - Menteri Besar Selangor (Pemerbadanan) atau MBI melancarkan Pelan Anti Rasuah Organisasi (OACP) untuk membentuk warga kerja bebas rasuah dan berintegriti tinggi.

Lima anak syarikat MBI iaitu Pengurusan Air Selangor Sdn Bhd, Kumpulan Perang-sang Selangor Bhd, Permodalan Negeri Selangor Berhad, Kumpulan Semesta Sdn Bhd dan Kumpulan Hartanah Selangor Berhad terlibat dalam pelan itu.

Dato' Menteri Besar Dato' Seri Amirudin Shari berkata MBI satu-satunya anak syarikat negeri yang menyediakan pelan khusus merangkumi semua perkara yang memungkinkan pelakuan rasuah.

Ditemui selepas menyempurnakan pelancaran program itu pada 8 November, beliau berkata ia meliputi polisi hadiah, cuti dan urusan lain yang boleh mendorong rasuah dalam organisasi.

Amirudin menambah MBI melalui Jabatan Integriti dan Governans giat menjalankan program kesedaran integriti sejak 2021 bagi mencegah gejala rasuah dalam kalangan warga kerja dan masyarakat.

**IMBAS DI SINI**  
akbar digital minggu lepas

## RS-1 pacu pelaburan RM29.1 billion

**SHAH ALAM** - Rancangan Selangor Pertama (RS-1) yang dilancar tahun lalu bagi merangka pembangunan negeri menerima komitmen pelaburan RM29.1 bilion setakat ini, kata Dato' Menteri Besar.

Dato' Seri Amirudin Shari berkata jumlah itu melibatkan beberapa projek mega antaranya Pembangunan Kawasan Sabak Bernam (SABDA), Wilayah Pembangunan Bersepadu Selangor Selatan (IDRISS), Gerbang Maritim Selangor (SMG) serta projek bernilai tinggi.

"Kalau saya ringkaskan sebahagian daripadanya sektor pembuatan iaitu Taman Industri Pintar di IDRISS. Ada juga sektor perkhidmatan seperti pembinaan Loji Rawatan Air Sungai Rasau atau pusat data di Petaling Jaya dengan nilai RM3 bilion.

"Projek pertanian di SABDA libatkan lebih RM60 juta. Ini adalah sektor tumpuan yang ada dalam tawaran setakat ini. Taman aero belum ada komitmen sebab kita sedang bincang hal tanah," katanya di Dewan Negeri Selangor

(DNS) pada 15 November.

Menjawab soalan wakil rakyat Gombak Setia Hilman Idham, Amirudin berkata RS-1 merupakan inisiatif negeri bagi menggerak dan mengembangkan ekonomi melalui 262 projek spesifik.

"Semua projek mempunyai fungsi ekonomi serta mencapai keseimbangan infrastruktur dengan pengukuhan sosioekonomi rakyat yang berpegang kepada tekad pembangunan mampan," katanya.

## Kongsi dividen, semak fi

# Tingkat hasil negeri RM100 juta

Oleh NORRASYIDAH ARSHAD

**SHAH ALAM** - Hasil negeri dijangka bertambah lebih RM100 juta mulai tahun depan selepas pentadbiran negeri memperkenal tiga langkah baharu, kata Dato' Menteri Besar.

Menurut Dato' Seri Amirudin Shari, usaha meliputi perkongsian dividen anak syarikat dengan anggaran RM40 juta dan semakan fi pejabat bawah kaerah tanah negeri berjumlah RM50 juta.

Turut dilaksanakan, menaikkan caruman parit sebanyak RM10 juta yang da-

lam penilaian berikut ia tidak pernah dikutip Kerajaan Negeri sebelum ini.

"(Ketika ini) hasil negeri bergantung sepenuhnya kepada sumber hasil tanah seperti cukai premium, permit galian dan bayaran perkhidmatan yang menyumbang 80 peratus," katanya dalam sidang Dewan Negeri Selangor (DNS) pada 14 November.

Menjawab soalan tambahan Ahli Dewan Negeri Hulu Kelang Dato' Seri Mohamed Azmin Ali, Amirudin berkata piakahnya juga giat meneroka projek tenaga hijau bagi menambah lagi hasil negeri.

Pada 10 November, Amirudin memak-

lumkan jumlah agregat terkumpul Kum-pulan Wang Disatukan Kerajaan Negeri terus kukuh dan stabil mencecah RM3.71 bilion setakat 9 November tahun ini.

Beliau menjelaskan peningkatan RM631.48 juta berbanding tahun lalu meliputi Akaun Hasil Disatukan berjumlah RM1.49 bilion dan Akaun Amanah Disatukan, RM2.21 bilion.

Menggunakan pendekatan dan strategi perbelanjaan berkesan serta berhemah, beliau berkata prestasi ke-wangan negeri sehingga tempoh itu juga merekodkan lebihan kewangan sebanyak RM427.25 juta.

## Pertingkat usaha tangani banjir

**SHAH ALAM** - Kerajaan Negeri mengambil langkah segera untuk mengurangkan risiko banjir ketika musim Monsun Timur Laut yang diramal bermula bulan ini.

Dato' Menteri Besar berkata beliau akan mendapatkan laporan unit pengurusan bencana negeri dan semua pihak berkuasa tempatan mengenai tindakan menangani banjir di lokasi yang dikenal pasti berisiko tinggi.

"Kita menunggu laporan berhubung langkah yang diambil pihak berkaitan bagi mengelak berlakunya banjir. Bulan lalu saya sudah memberi arahan supaya kawasan kerap banjir ditangani tetapi masih berlaku.

"Saya serius untuk menangani isu ini kerana bah kerap berlaku di tempat sama seperti Kampung Chemperai (Sepang), Labuhan Dagang dan Bukit Changgang (Banting)," kata Dato' Seri

Amirudin Shari pada 8 November.

Mengulas lanjut, beliau berkata persediaan rapi telah diambil untuk mendepani banjir termasuk menyediakan keperluan asas kepada mangsa terlibat.

"Selain memastikan keperluan asas kepada mangsa banjir cukup, kita turut menghulurkan bantuan segera wang tunai RM500 kepada mereka," katanya.

## China buka kilang bateri di Banting

**SHAH ALAM** - Tenpower, pengeluar bateri lithium ion terbesar di China bakal membuat pelaburan RM1.3 bilion di Selangor dengan membangunkan kilang seluas 48 ekar di Banting, Kuala Langat.

EXCO Perdagangan Ng Sze Han menjelaskan pelaburan syarikat pengeluar bahan berkenaan yang kedua terbesar di dunia itu bakal mewujudkan 700 pekerjaan termasuk 300 jurutera.

"Ini pelaburan penting dan Selangor

komited untuk menjayakannya," kata beliau di Facebook pada 8 November ketika mengunjungi ibu pejabat Ten-power di Jiangsu, China pada 7 November.

Beliau berkata demikian dalam rakaman ketika mengadakan lawatan bersama rombongan agensi pelaburan negeri, Invest Selangor Berhad ke republik tersebut.

Tenpower yang didirikan pada 2006 memiliki pelaburan bernilai 10 juta

Yuan di seluruh China.

Sebelum ini, Dato' Menteri Besar Dato' Seri Amirudin Shari memaklumkan Selangor menerima pelaburan RM60 bilion sepanjang tahun lalu sekali gus mencipta 19,000 peluang pekerjaan.

Beliau juga yakin kejayaan berke-naan hasil daripada sektor perkhid-matan dan pembuatan yang menjadi teras ekonomi negeri dan penampang ketika pandemik.



Noraini (tengah) menerima Anugerah Kepimpinan PBT Terbaik daripada Fadillah (dua, kanan) dan Kor Ming (dua, kiri) dalam Majlis Anugerah Kecemerlangan Menteri Pembangunan Kerajaan Tempatan 2023 di Kuala Lumpur pada 12 November. Foto Facebook KPCT Malaysia

Nilai baucar Jom Shopping naik

# Permohonan naik tiga kali ganda

Oleh NORRASYIDAH ARSHAD

**SHAH ALAM** - Permohonan Skim Mesra Usia Emas (SMUE) meningkat tiga kali ganda berikutan penambahan nilai baucar Jom Shopping daripada RM100 kepada RM150 yang dilaksana tahun ini.

EXCO Kebajikan Masyarakat Anfaal Saari berkata seramai 110,566 warga emas memohon skim berkenaan sejak Oktober, berbanding 29,777 permohonan pada tahun lalu.

"Ini menyebabkan kelewatan pendaftaran ahli SMUE selain faktor penjenamaan semula Skim Mesra bagi golongan orang kurang upaya (OKU) kepada Skim Mesra Insan Istimewa.

"Selain itu, penebusan baucar juga tidak lagi dibuat pada bulan kelahiran, sebaliknya boleh dibuat sepanjang tahun," katanya dalam sidang Dewan Negeri Selangor (DNS) pada 14 November.

Menjawab soalan wakil rakyat Pandamaran Leong Tuck Lee, Anfaal berkata Kerajaan Negeri membentuk pa-

sukan khas yang bertanggungjawab memproses permohonan bagi mengatasi isu kelewatan.

Jelasnya, usaha itu membolehkan 39,882 borang diproses dalam seminggu selain Yayasan Warisan Anak Selangor berusaha menyemak dengan kelulusan dijangka selesai akhir Disember ini.

Mulai tahun ini, nilai baucar SMUE ditambah kepada RM150 melibatkan peruntukan RM37.5 juta dengan had kelayakan pendapatan isi rumah dinaikkan kepada RM3,000 sebulan.

# Perundangan syariah terus kukuh

**SHAH ALAM** - Penggunaan sistem perundangan syariah negeri tidak sesekali terjejas berikutan Duli Yang Maha Mulia Sultan Selangor Sultan Sharafuddin Idris Shah Alhaj sentiasa melindunginya.

Menyifatkan dakwaan Pemuda PAS Malaysia sebagai fitnah, EXCO Agama Islam Dr Mohammad Fahmi Ngah menegaskan majlis dan jabatan agama berfungsi mendaulatkan syiar Islam, lapor Bernama.

"Tuanku (Sultan Selangor) masih ada, Mais (Majlis Agama Islam Selangor) masih ada, Jais (Jabatan Agama Islam

Selangor) masih ada, saya masih EXCO Agama Islam pun ada, di mana isunya?

"Janganlah main politik fitnah ini, yang kita sedang buat ini untuk memperkasakan dan supaya mendaulatkan syiar Islam di Selangor, itu jelas," katanya.

Sebelum ini, Pemuda Pas Malaysia menerusi aplikasi X mendakwa undang-undang jenayah syariah bakal lenyap jika rakyat terus berdiam diri dan ia kononnya telah berlaku di Selangor.

Beliau turut mencabar sayap parti politik itu untuk membuktikan tuduhan kononnya undang-undang

jenayah syariah bakal lenyap dan perkara itu didakwa berlakukan di negeri ini.

"Kita bagi ruang untuk enak-men-enakmen negeri berkembang mengikut peredaran zaman. Yang dia (dakwa) bakal lenyap, mereka berjaya di Selangor. Apa buktinya? saya cabar mereka," katanya.

Berikutan itu, sebanyak 22 cabang Angkatan Muda Keadilan (AMK) dan Pemuda Amanah Selangor membuat laporan polis berhubung isu berkenaan.

# Noraini pemimpin terbaik PBT

**SHAH ALAM** - Yang Dipertua Majlis Perbandaran Klang (MPK) Noraini Roslan menerima Anugerah Kepimpinan PBT Terbaik sempena Majlis Anugerah Kecemerlangan Menteri Pembangunan Kerajaan Tempatan (KPKT) 2023.

Anugerah berkenaan disampaikan Timbalan Perdana Menteri II Datuk Seri Fadillah Yusof diiringi Menteri KPCT Nga Kor Ming di Hotel The St Regis, Kuala Lumpur pada 12 November.

Noraini berkata kemenangan berkenaan untuk semua kakitangan MPK dan rakyat Klang yang bersama-sama berusaha memajukan bandar berkenaan ke arah lebih baik.

"Syukur, Alhamdulillah dengan kejayaan ini. Saya rasa anugerah ini merupakan antara pencapaian terbaik yang pernah saya perolehi."

"Anugerah ini berdasarkan kepada penilaian juri terhadap sumbangan saya selama ini dari pada segi perancangan pembangunan sebagai YDP di beberapa PBT yang pernah saya berkhidmat selama ini," katanya menerusi kenyataan pada 15 November.

Dalam majlis sama, Majlis Bandaraya Petaling Jaya turut menerima Anugerah PBT Cemerlang (Bandaraya).

# Agih bantuan tunai selepas bah

**SEPANG** - Bantuan kewangan RM500 kepada mangsa banjir kilat di beberapa daerah akan disalur sebaik mereka pulang ke kediaman masing-masing, kata Dato' Menteri Besar.

Dato' Seri Amirudin Shari menjelaskan tumpuan pada masa ini untuk memastikan mangsa yang ditempatkan di pusat pemindahan sementara (PPS) dalam keadaan selamat.

"Itu (bantuan kewangan) akan dibuat dalam masa terdekat. Saya ingat selepas mereka pulang. Sekarang kita mahu pastikan mereka dapat berlindung dahulu," katanya pada 9 November.

# Operasi van transit 20 November

**SHAH ALAM** - Perkhidmatan van transit atas permintaan (DRT) akan beroperasi di empat kawasan berkepadatan tinggi dan laluan sempit mulai 20 November, kata EXCO mobiliti.

Menurut Ng Sze Han, projek rintis di Puchong, Bandar Utama, Ampang dan Subang Jaya dilaksanakan selama enam bulan sebagai usaha menggantikan kemudahan Bas Smart Selangor.

Beliau memaklumkan pengguna juga dikenakan caj RM2 dengan lebihan kos ditanggung Kerajaan Negeri sebagai galakan penggunaan DRT.

"Sasaran tumpuan lokasi berdekatan pengangkutan awam utama seperti rel dan stesen bas bagi melengkapkan perbatuan pertama dan terakhir sistem pengangkutan awam," katanya pada 14 November.

## Strategi negeri terus cemerlang

**SHAH ALAM** - Belanjawan Selangor 2024 peluang terbaik pentadbiran negeri untuk bangkit selain melakukan penambahbaikan bagi meneruskan kecermerlangan.

Ahli Dewan Negeri Pelabuhan Klang Azmizam Zaman Huri berkata rancangan kemajuan yang dirangka seawal 2018 itu terhenti berikutan cabaran besar dihadapi termasuk penularan pandemik Covid-19 selain bencana banjir dan krisis politik.

"Belanjawan tahun depan memastikan Selangor bersedia menghadapi pelbagai bentuk ancaman masa depan termasuklah perubahan iklim, geopolitik serta ancaman ekonomi."

"Menerusi empat teras, belanjawan ini turut bersumberkan Rancangan Selangor Pertama (RS-1) dan kerjasama pertama negeri dengan persekutuan," katanya pada 14 November.

## Lunas hutang bukti kewangan kukuh

**SHAH ALAM** - Kesungguhan untuk melunaskan baki hutang pinjaman Projek Bekalan Air dan Skim Amanah Saham Selangor (ASAS) bernilai RM19.2 juta bakal meletak Selangor maju ke depan.

Ahli Dewan Negeri Lembah Jaya Syed Ahmad Syed Abdul Rahman atau Altimet berkata penyelesaian penuh hutang kepada kerajaan persekutuan membuktikan kemampuan kewangan pentadbiran negeri.

"Penyelesaian sepenuhnya (baki hutang) menunjukkan kemampuan pentadbiran negeri yang padu berdasarkan tatakelola cemerlang Pakatan Harapan," katanya dalam kenyataan pada 11 November.

Dalam pembentangan Belanjawan Selangor 2024, Dato' Menteri Besar Dato' Seri Amirudin Shari menjangka hutang dengan kerajaan persekutuan dilunaskan sepenuhnya tahun depan.

Baki hutang RM19.20 juta terdiri daripada pinjaman ASAS selain komitmen penyelesaian liabiliti hutang negeri pada 2024 juga rendah, hanya melibatkan penyelesaian baki ansuran akhir Skim ASAS berjumlah RM1.89 juta.

Baki pinjaman Projek Bekalan Air sebanyak RM17.3 juta pula dipindah kepada Pengurusan Aset Air Berhad (PAAB) yang hanya memerlukan urusan dokumentasi.

## Bela kebajikan siswa Timur Tengah

**SHAH ALAM** - Peruntukan RM5 juta dalam Belanjawan 2024 bagi pembangunan dan pengurusan mahasiswa Timur Tengah menjamin keselamatan serta keserasian anak Selangor di luar negara.

Gembira dengan pengumuman itu, EXCO Hal Ehwal Agama Islam Dr Mohammad Fahmi Ngah berkata inisiatif tersebut membuktikan pentadbiran negeri cakna kebajikan pelajar di sana.



"Turut mengujakan, dana besar meningkat taraf masjid dan subsidi yuran Kelas al-Quran dan Fardu Ain Integrasi yang membuktikan Selangor mendaulat syiar Islam," katanya pada 10 November.

EXCO Sukan Najwan Halimi pula menyambut baik peruntukan RM10 juta yang diumumkan kepada pasukan Selangor FC untuk memastikan bola sepak negeri

meneruskan rentak cemerlang.

Berhubung penubuhan Liga e-Sukan di setiap daerah, beliau berkata program itu akan diperluas untuk mencapai matlamat sekali gus meningkatkan kemahiran dan ekonomi belia.

"Kita akan jana program e-sukan peringkat daerah dan beri ruang kepada belia untuk ceburinya. Ia bukan sekadar hobi, sebaliknya karier untuk meningkatkan ekonomi anak muda," katanya.

### Sedia peruntukan RM59.7 juta

## Khidmat rawatan RM10,000 setahun

Oleh SHEEDA FATHIL

**SHAH ALAM** - Keputusan pentadbiran negeri meneruskan program kesihatan awam dalam Belanjawan Selangor 2024 membuktikan kebajikan penduduk berpendapatan rendah sentiasa diambil berat.

EXCO Kesihatan Awam Jamaliah Jamaluddin menegaskan program Iltizam Selangor Sihat (ISS) penting bagi memastikan rakyat menerima perkhidmatan rawatan asas dan manfaat insurans.

Beliau percaya manfaat RM10,000 setahun yang diumumkan menerusi belanjawan berkenaan memberi peluang kepada penduduk berpendapatan

rendah menikmati rawatan di hospital swasta.

"Kita sedia maklum kos rawatan di hospital swasta agak tinggi selain kesesakan di hospital awam," katanya pada 12 November.

Sebanyak RM59.7 juta disediakan untuk program kesihatan awam melalui dana RM35 juta yang memberi manfaat kepada 100,000 pemegang polisi utama dan anggaran 150,000 ahli keluarga berdaftar.

EXCO Kebajikan Masyarakat Anfaal Saari turut menyambut baik agenda berkaitan portfolionya dan berharap perancangan tahun hadapan berjalan lancar.



"Jabatan Anak Istimewa Selangor (ANIS) akan diperbadan secara rasmi sebagai sebuah yayasan. Saya berharap usaha ini dapat mengembangkan tawaran manfaat kepada anak istimewa kita."

"Selain itu, ekonomi penjagaan kini secara rasmi mendapat belanjawan tahun penuh pertama. Insya-Allah usaha untuk memartabatkan sektor ini akan lebih mapan dan tersusun," katanya.

Belanjawan negeri memperuntuk RM5 juta bagi menubuhkan Yayasan Insan Istimewa Selangor (YANIS) dan melaksana program utama untuk orang kurang upaya pada tahun depan.

## Perkuuh pelan tindakan kesihatan

**SHAH ALAM** - Peruntukan RM59.7 juta bagi meneruskan agenda kesihatan awam membuktikan kesungguhan pentadbiran negeri dalam memperkuuh pelan tindakan kesihatan awam di negeri ini.

Ahli Penasihat Kesihatan Awam Negeri Dr Mohammad Farhan Rusli berkata dana yang diumumkan dalam Belanjawan Selangor 2024 mencer-



minkan keprihatinan terhadap aspek kesihatan rakyat.

Mengambil contoh dana RM35 juta bagi kesinambungan program Iltizam Selangor Sihat, beliau menjelaskan langkah itu membantu pemegang polisi mendapat rawatan segera di klinik swasta.

"Ia langkah tepat yang kita buat sejak empat tahun lepas sekali gus mengukuhkan lagi pelan tindakan kesih-

tan awam di Selangor.

"ISS juga diadaptasi kerajaan persekutuan melalui Skim Perubatan Madani sekali gus ini menunjukkan langkah Kerajaan Selangor sejak empat tahun lepas tepat," katanya pada 13 November.

Mohammad Farhan menambah kesihatan awam tahun depan turut memberi tumpuan kepada inisiatif se- dia ada seperti kesihatan mental, Anak Selangor Anak Sihat dan rawatan mata termasuk skim rawatan jantung.

	Hulu Selangor, Gombak, Petaling,			Hulu Langat dan Sepang				Klang dan Kuala Langat				Sabak Bernam dan Kuala Selangor				Sabak Bernam dan Kuala Selangor					
	Imsak	Subuh	Syuru'	Zuhur	Asar	Maghrib	Isyak	Imsak	Subuh	Syuru'	Zuhur	Asar	Maghrib	Isyak	Imsak	Subuh	Syuru'	Zuhur	Asar	Maghrib	Isyak
16 Khamis	5:39	5:49	6:57	1:01	4:22	6:59	8:11	5:39	5:49	6:58	1:01	4:23	7:00	8:12	5:41	5:51	6:59	1:03	4:25	7:00	8:13
17 Jumaat	5:39	5:49	6:57	1:01	4:23	6:59	8:11	5:39	5:49	6:58	1:01	4:23	7:00	8:12	5:41	5:51	6:59	1:03	4:25	7:00	8:13
18 Sabtu	5:39	5:49	6:57	1:01	4:23	6:59	8:12	5:39	5:49	6:58	1:02	4:24	7:00	8:13	5:41	5:51	6:59	1:03	4:25	7:01	8:13
19 Ahad	5:39	5:49	6:58	1:01	4:23	6:59	8:12	5:39	5:49	6:59	1:02	4:24	7:00	8:13	5:42	5:52	7:00	1:04	4:26	7:01	8:14
20 Isnin	5:39	5:49	6:58	1:02	4:24	6:59	8:12	5:39	5:49	6:59	1:02	4:24	7:00	8:13	5:42	5:52	7:00	1:04	4:26	7:01	8:14
21 Selasa	5:40	5:50	6:58	1:02	4:24	6:59	8:13	5:40	5:50	6:59	1:02	4:25	7:00	8:14	5:42	5:52	7:00	1:04	4:26	7:01	8:14
22 Rabu	5:40	5:50	6:59	1:02	4:24	7:00	8:13	5:40	5:50	6:59	1:03	4:25	7:01	8:14	5:42	5:52	7:01	1:04	4:26	7:01	8:14



**AMANAH...** Dato' Menteri Besar Dato' Seri Amirudin Shari merasmikan sambutan Hari Integriti dan pelancaran Pelan Anti Rasuah Organisasi Menteri Besar Selangor (Pemerbadanan) dan anak syarikat milikannya di Pusat Konvensyen Shah Alam pada 8 November. Foto HAFIZ OTHMAN

Selesai 101 projek sejak 2007

# Serius tangani isu rumah terbengkalai

Oleh SHEEDA FATHIL

**SHAH ALAM** - Peruntukan khas untuk pemulihan rumah terbengkalai membuktikan pentadbiran negeri serius untuk menyelesaikan isu tersebut, kata EXCO Perumahan Borhan Aman Shah.

Beliau menjelaskan Lembaga Perumahan dan Hartanah Selangor sebagai agensi pemantauan sentiasa berusaha memastikan projek terbengkalai disiapkan sehingga sijil layak menduduki diperoleh.

"Isu tersebut menjadi tumpuan uta-

ma tahun depan. Dengan peruntukan ini, ia mampu merancakkan usaha pemulihan tersebut seterusnya membela nasib pembeli rumah," katanya pada 12 November.

Dato' Menteri Besar ketika membentang Belanjawan Selangor 2024 berkata Jawatankuasa Pemulihan Projek Terbengkalai memulihkan 101 projek meliputi 39,476 unit rumah sejak 2007.

Menurut Dato' Seri Amirudin Shari, sebanyak RM18 juta diperuntuk ke dalam Tabung Pemulihan Projek Terbengkalai Selangor bagi merancakkan lagi usaha pemulihan tersebut.

Selain itu, Borhan yang juga EXCO pembangunan bandar lestari turut berterima kasih kepada Amirudin yang menyediakan peruntukan RM500,000 bagi program Rewang Komuniti Strata.

"Program julung kali bakal dianjur tahun depan tertumpu kepada kawasan pangaspuri yang akan diadakan selama dua hari satu malam dengan pelbagai pengisian program menarik.

"Kita mahu menghidupkan mengerat ukhwah kejiranan kerana seperti kita sedia maklum penduduk perumahan bertingkat adakalanya tidak saling mengenali seperti di desa," katanya lagi.

# Tingkat ekonomi, prasarana desa

**SHAH ALAM** - Belanjawan Selangor 2024 dijangka mampu memperkasa ekonomi dan prasarana luar bandar sekali gus memberi keseimbangan pembangunan antara kawasan, kata EXCO kemajuan desa.

Datuk Rizam Ismail menjelaskan peruntukan RM4 juta untuk menaik taraf kemudahan awam dan jumlah sama bagi pemberdayaan ekonomi desa membantu usaha menjayakan



pelbagai agenda penting.

Beliau menambah ia termasuk menyusun sistem kepimpinan desa bawah Gagasan Rumpun Selangor, program yang menerap elemen adat dan tradisi selain menonjolkan keunikian setiap daerah.

"Saya juga menzahir penghargaan kerana mengangkat cadangan untuk memperkenal Gagasan Rumpun Selangor bagi menyemarakkan perpa-

duan dalam kalangan rakyat," katanya pada 12 November.

Dalam Belanjawan Selangor, Gagasan Rumpun Selangor diperkenal bagi meraih kepelbagaian dan menyemarak semangat perpaduan segenap lapisan masyarakat di negeri ini.

Menurut Dato' Menteri Besar Dato' Seri Amirudin Shari, Karnival dan Jejalah Perpaduan Rumpun Selangor akan diadakan meliputi sembilan daerah melalui peruntukan RM4.5 juta.

## Kekal keharmonian, semangat bersama

**GOMBAK** - Semangat keharmonian perpaduan harus dikenalkan dan diterjemah dalam masyarakat terutama apabila berdepan isu antarabangsa.

Justeru, Dato' Menteri Besar Dato' Seri Amirudin Shari berkata semua pihak wajar menyokong usaha perdana menteri membawa mesej keamanan dan kemakmuran rakyat Palestin.

"Yang amat berhormat Datuk Seri Anwar Ibrahim juga tidak menggunakan isu itu untuk kepentingan politik peribadi yang sempit.

"Oleh itu, saya berharap semangat ini dapat dikenalkan terutama apabila berdepan dengan isu antarabangsa kita perlu bersama tetapi apabila isu domestik kita faham masing-masing ada pandangan tersendiri," katanya sempena sambutan Deepavali pada 12 November.

## Inisiatif MamaKerja capai sasaran

**SHAH ALAM** - Insentif penjagaan anak kepada wanita bekerja yang diperkenal Kerajaan Negeri pada 1 November lalu menerima sambutan menggalakkan selepas enam hari pelancarannya.

EXCO pembangunan wanita berkata inisiatif MamaKerja yang dibangunkan menerusi aplikasi Langkah Masuk Dengan Selamat (SELangkah) ditutup selepas mencapai sasaran 5,000 permohonan.

"Kita terima sambutan yang sangat baik daripada wanita bekerja. Dalam tempoh enam hari, permohonan kita laris seperti pisang goreng panas.

"Mereka yang sudah berdaftar, boleh semak permohonan masing-masing dalam tempoh 14 hingga 21 hari selepas permohonan dibuat," kata Anfaal Saari pada 14 November.

Katanya setakat ini Kerajaan Negeri belum berhasrat menambah kuota penerima kerana mahu melunaskan janji sedia ada.

## Rancang bina loji tenaga Jun 2024

**SHAH ALAM** - Loji Tenaga Hijau Sultan Idris Shah (SISGE) dijangka memulakan pembinaan fasa pertamanya di Gombak selepas Jun depan, kata pengarah urusan KDEB Waste Management (KDEBWM).

Dato' Ramli Mohd Tahir berkata pembinaan fasa pertama loji tenaga mesra alam dan komuniti itu turut dilengkapi dengan kemudahan infrastruktur sokongan.

"Projek fasa pertama bermula secara fizikal selepas mencapai 'targeted financial closed (FC)' pada Jun tahun depan dan jangka masa pembinaan adalah 36 bulan.

"Segala perincian projek fasa pertama akan dimaklumkan kepada pihak awam menerusi proses kajian alam sekitar yang telus dan lengkap serta dijangka siap pada hujung tahun ini," katanya pada 14 November.

## Tuisyen percuma buat 130,000 murid

**SHAH ALAM** - Seramai 130,000 pelajar tingkatan empat dan lima disasar mendapat manfaat menerusi Program Tuisyen Rakyat Selangor (PTRS) tahun depan, maklum Menteri Besar Selangor (Pemerbadanan).

Ketua tanggungjawab sosial korporat dan komunikasi korporatnya berkata pembelajaran percuma itu melibatkan peruntukan RM10 juta berbanding RM7 juta sebelum ini, selaras pengumuman Belanjawan Selangor 2024.

"PTRS bukan hanya menyasarkan pelajar tingkatan lima yang bakal menduduki Sijil Pelajaran Malaysia, bahkan dipanjangkan kepada pelajar tingkatan empat.

"Ia sekali gus untuk menunaikan hasrat Kerajaan Negeri yang mahu jumlah pelajar mendapat manfaat PTRS seramai 200,000 dalam tempoh lima tahun sejajar Tawaran Kita Selangor," kata Ahmad Azri Zainal Nor.

## Usaha tingkat kadar kitar semula

**SHAH ALAM** - Pembangunan kemudahan kitar semula berteknologi tinggi iaitu Selangor Recycle Surge (SRS) membantu meningkatkan kadar kitar semula di negeri ini kepada 15 peratus menjelang 2025.

Pengarah Urusan KDEB Waste Management (KDEBWM) berkata projek jangka panjang melalui peruntukan RM3 juta itu dilaksana secara berperingkat sekali gus mencapai sasaran dalam Rancangan Selangor Pertama (RS-1).

Dato' Ramli Mohd Tahir menjelaskan pembinaan projek meliputi fasiliti pengumpulan bahan pemulihan, pusat kitar semula komuniti, 'Drop Off Recycling Centre' dan pusat kitar semula pandu lalu automatik.

"KDEBWM merancang menambah sekurang-kurangnya lima lagi fasiliti kitar semula. Pelaksanaan projek ini tertakluk peruntukan kewangan Kerajaan Negeri dan inisiatif dana swasta," katanya pada 14 November.

## Saringan fokus khidmat bergerak

**SHAH ALAM** - Program saringan kesihatan percuma anjuran Kerajaan Negeri diteruskan tahun depan melalui perkhidmatan bergerak, kata ahli penasihat kesihatan awam negeri.

Dr Mohammad Farhan Rusli berkata kaedah berbeza diperkenal bagi memastikan lebih ramai rakyat termasuk di pedalamen menikmati manfaat program Selangor Saring.

"Baki peruntukan tahun ini banyak digunakan untuk buat saringan berdasarkan permintaan wakil rakyat termasuk wakil badan pengurusan bersama di projek perumahan rakyat terutama selepas pembubaran Dewan Undangan Negeri.

"Jadi tahun depan kita fokus kepada 'mobile outreach'. Mana-mana kita sampai, kita buat terus saringan kepada rakyat."

## Pasang pam tangani banjir kilat

**SEPANG** - Pam air akan ditempatkan di Sungai Labu sebagai penyelesaian jangka pendek bagi mengatasi masalah banjir kilat di persimpangan lampu isyarat Kiwa, Kota Warisan di sini.

Dato' Menteri Besar Dato' Seri Amirudin Shari menerangkan laluan dari Cyberjaya ke Lapangan Terbang Antarabangsa Kuala Lumpur (KLIA) sering dilanda bah apabila hujan lebat.

Menjelaskan Majlis Perbandaran Sepang berusaha untuk mengalih air ke sungai berdekatan, beliau berkata bah berpunca akibat pergerakan air perlahan selain pembangunan rancak di sekitarnya.

"Ada penyelesaian jangka panjang tetapi untuk jangka pendek, kita letak pam supaya percepat aliran apabila kadar air meningkat," katanya selepas

meninjau lokasi itu pada 9 November.

Terdahulu, beliau melawat mangsa banjir di pusat pemindahan sementara di Sekolah Menengah Kebangsaan (SMK) Dengkil dan Dewan Orang Ramai Dato' Ahmad Razali.

Pada 5 November, sebahagian laluan di persimpangan lampu isyarat Kiwa terpaksa ditutup kepada pengguna susulan banjir.

## Lunas manifesto kurang 100 hari

# Bukti kesungguhan Kerajaan Perpaduan

Oleh SUHAILA SHAHRUL ANNUAR

**HULU LANGAT** - Kejayaan Kerajaan Perpaduan di Selangor melunaskan lima manifesto penting dalam tempoh kurang 100 hari pentadbiran bukti komitmen jitu mengekalkan daya saing dan daya tahan negeri ini.

Dato' Seri Amirudin Shari berkata dalam tempoh 76 hari selepas mengangkat sumpah sebagai Dato' Menteri Besar buat penggal kedua pada 21 Ogos, lima tawaran mencakupi pelbagai bidang iaitu ekonomi, kebajikan wanita dan petani, pendidikan serta pemerksaan institusi agama berjaya dilengkapkan.

"Alhamdulillah walaupun saya janjikan 100 hari bermakna daripada tarikh saya angkat sumpah saya ada 100 hari melunaskan janji dan tekad tersebut.

"Hari ini (6 November) tepat hari ke-76 selepas angkat sumpah selaku MB kita dapat laksanakan e-baucar buku sekali gus melengkapkan kelima-lima perkara yang kita janjikan dalam tempoh 100 hari pentadbiran," katanya pada pelancaran Tekad Pendidikan Kita Selangor: Penyerahan e-Baucar Buku Mahasiswa 2023.

Amirudin berkata usaha memajukan negeri mencakupi pelbagai bidang menjadi keutamaan bagi memastikan Selangor kekal sebagai

permata dan pusat penting pembangunan dan kemajuan dalam negeri, negara serta rantau Asia Tenggara.

E-baucar buku mahasiswa bernilai RM200 bakal memanfaatkan 1,000 mahasiswa anak Selangor yang menuntut di sembilan Institusi Pengajian Tinggi Awam dan Institusi Pengajian Tinggi Swasta dengan peruntukan RM200,000 daripada Menteri Besar Selangor (Pemerbadanan) atau MBI.

Empat janji sebelum ini iaitu insentif RM1,000 bagi penjagaan anak, pengecualian cukai taksiran, kenaikan elaun pentadbir insititusi Islam dan RM1,000 untuk nelayan serta petani telah ditunaikan dalam tempoh 100 hari pentadbiran.

## e-Baucar galak budaya membaca

**HULU LANGAT** - Inisiatif pemberian e-baucar buku mahasiswa oleh Kerajaan Negeri sedikit sebanyak membantu meringankan perbelanjaan pelajar terutama untuk pembelian buku akademik.

Penuntut jurusan undang-undang Universiti Islam Antarabangsa Malaysia K Yuveraaj Pillai, 21, mahu memanfaatkan baucar berkenaan untuk membeli pelbagai buku rujukan.



"Jurusan undang-undang menggunakan banyak jenis buku dan harapannya agak mahal, pastinya baucar ini sangat membantu. Inisiatif ini amat saya hargai dan wajar diteruskan," katanya pada 6 November.

Penuntut jurusan kejuruteraan perisian Universiti Selangor Fatin Hawani Mohd Fadzil, 21, pula menambah inisiatif pentadbiran negeri menggalakkan budaya

membaca dalam kalangan pelajar.

"Penggunaan platform digital bagi pemberian baucar buku ini juga akan merancakkan usaha pendigitalan dan menggalakkan penggunaan e-dompet dalam dunia digital kini," katanya.

E-baucar buku mahasiswa Kita Selangor dilancarkan Dato' Menteri Besar Dato' Seri Amirudin Shari bakal memanfaatkan 1,000 mahasiswa dengan peruntukan keseluruhan RM200,000.

## Belanja RM25 juta anjur program CSR

**SEPANG** - Sebanyak RM25 juta dibelanjakan Menteri Besar Selangor (Pemerbadanan) atau MBI bagi pelbagai program tanggungjawab sosial korporat (CSR) sejak awal tahun hingga ke saat ini.

Ketua tanggungjawab sosial korporat dan komunikasi korporatnya berkata dana tahunan itu menjayakan Program Tuisyen Rakyat Selangor, sumbangan Haji Muassasah dan Bantuan Khas Ke-

wangan untuk petugas masjid dan ketua kampung.

Ahmad Azri Zainal Nor menambah peruntukan itu juga digunakan untuk program membabitkan masyarakat, penggiat sukan dan bantuan mangsa bencana.

"MBI terima peruntukan tahunan RM30 juta untuk menjayakan program CSR. Setakat ini, tiada keperluan tambah

peruntukan kerana sudah penghujung tahun.

"Ketika ini, kita tumpu hadapi bencana. Kita siapkan hampir RM500,000 bagi tujuan itu," katanya pada 7 November.

Katanya Selangor turut menerima dana tambahan daripada Agensi Pengurusan Bencana Negara (Nadma) yang akan diserahkan kepada Unit Pengurusan Bencana Negeri.



Mohd Sany merasmikan program Rumpun Selangor D'Desa daerah Hulu Langat di Institut Kemahiran Tinggi Belia Negara Dusun Tua pada 11 November. Foto AHMAD ZAKKI JILAN

## Rumpun Selangor D'Desa

# Semarak semangat kekitaan

Oleh FITRI HAZIM HAZAM

**HULU LANGAT** - Penganjuran program Rumpun Selangor D'Desa peringkat Hulu Langat menyemarakkan lagi semangat kekitaan dalam kalanng masyarakat berbilang kaum.

Ahli Parlimen Hulu Langat Mohd Sany Hamzan juga yakin penganjurannya menghidupkan semula adat dan tradisi bermasyarakat seperti rewang dan bergotong-royong.

"Program ini mengembalikan suasana zaman dahulu seperti rewang di waktu majlis perkahwinan, ada aktiviti gotong-royong di taman perumahan yang membina hubungan kekitaan.

"Program ini juga menyatukan pengunjung melalui kegiatan sukan, persempahan tarian, muzik tradisional dan makanan," katanya di Institut Kemahiran Tinggi Belia Negara Dusun Tua pada 11 November.

Sementara itu, Penolong Pegawai Daerah Hulu Langat Muhamad Hafiz Mohd Nasir berkata program berkenaan mendapat sambutan penduduk se-tempat termasuk penyertaan beberapa agensi negeri yang berkongsi pelbagai manfaat untuk rakyat.

"Program ini menyatukan pelbagai bangsa termasuk dihadiri Orang Asli dan Jawa. Pengunjung disajikan dengan hidangan tradisi rendang Melayu Mandailing dan nasi minyak yang dimasak secara rewang.

"Sambutan amat mengalakkam, ramai yang teruja bermain sukan tradisional seperti timbang bulu tangkis berwarna, congkak, dam haji dan manganyam ketupat," katanya.

Program berkenaan turut dimeriahkan dengan acara cabutan bertuah dan pameran pelbagai agensi seperti Jabatan Penjara Malaysia, Jabatan Bomba dan Penyelamat (JBPM) Selangor dan Pengurusan Air Selangor Sdn Bhd (Air Selangor).

Dalam belanjawan 2024, Kerajaan Negeri memperkenal Gagasan Rumpun Selangor bagi meraikan kepelbagai dan menyemarak semangat perpaduan negeri ini.

Menerusi inisiatif itu, Dato' Menteri Besar Dato' Seri Amirudin Shari berkata karnival dan jelajah perpaduan diadakan di sembilan daerah dengan peruntukan RM4.5 juta.

"Antara program bakal dilaksanakan seperti jualan murah, sukan rakyat, saringan percuma dan turun padang bagi mempromosi pelbagai inisiatif."



## Jaya usaha kembang sektor halal negeri

**SHAH ALAM** - Peruntukan RM3 juta mampu menjayakan 10 inisiatif merangkumi lima teras bagi memperkasa dan mengembangkan sektor halal Selangor ke tahap lebih tinggi.

Pemangku ketua pegawai eksekutif HIS Toyibah Sdn Bhd menjelaskan inisiatif itu selaras aspirasi Jawatankuasa Tetap Industri Halal yang diketuai EXCO Negeri Dr Mohammad Fahmi Ngah.

Menurut Muhammad Syaril Showkat Ali, program itu merangkumi inovasi semakan digital pantas pensijilan halal dan galakan kepada pemain industri untuk menembusi pasaran ekonomi halal.

"Bawah teras promosi halal Selangor pula memfokuskan penganjuran Persidangan Halal Antarabangsa Selangor (Selhac) yang dijadual pada Julai 2024.

Beberapa perkara ditekankan melalui iaitu kecekapan proses pensijilan halal, kebolehkesan digital halal, kepentingan halal logistik selain penglibatan Selhac di peringkat Asean," katanya pada 11 November.

Beliau menambah inisiatif itu turut menumpukan inovasi pendigitalan halal dengan pembangunan sistem prapermonahan dan pembaharuan sijil halal, sejarah agenda memendekkan tempoh mendapatkan pensijilan kepada 23 hari.



#KitaSelangor

KDEB  
WASTE MANAGEMENT  
103002-H

## APLIKASI i-CLEAN SELANGOR

MEMUDAHKAN ANDA MENYALURKAN  
ADUAN TERUS KEPADA KAMI



Pendaftaran Mudah



Lebih Cekap



Maklum Balas Awal



20  
PCOM AWARDS  
BEST PUBLIC SECTOR APP  
i-CLEAN SELANGOR APP



KUTIPAN SAMPAH DOMESTIK



KUTIPAN SAMPAH PU�K



PEMBERISIHAN AWAM

**MUAT TURUN SEKARANG!**



Download on the  
App Store



ANDROID APP ON  
Google play

**UNTUK SEBARANG PERTANYAAN**  **1-800-88-2824**

## Kerjasama tingkat teknologi tani

**SHAH ALAM** - Perbadanan Kemajuan Pertanian Selangor (PKPS) komited untuk memulakan inisiatif jaminan bekalan makanan susulan pengumuman Belanjawan Selangor 2024.

PKPS memaklumkan pihaknya menjalin usaha sama dengan Jepun bagi menaik taraf teknologi pertanian berkaitan tanaman padi dan sayuran.

"Ketua Pegawai Eksekutif Kumpulan kami, Dr Mohamad Khairil Mohamad Razi baru-baru ini bertemu dengan Michihiro Mase, Timbalan Datuk Bandar Izumisano City, Osaka, Jepun.

"Ini sebahagian daripada proses bertenusan untuk mengenal pasti teknologi pertanian khusus berkaitan penanaman padi dan sayur-sayuran," katanya menerusi Facebook pada 14 November.

PKPS juga bakal menjadi rakan kongsi produk makanan halal bagi Ekspo Dunia di Osaka pada 2025, dengan jangkaan 28 juta pengunjung dan potensi pendapatan USD20 bilion.

## Daging, susu segar produk baharu JER

**SUBANG JAYA** - Daging kambing sejuk beku dan susu segar asli antara produk terbaru jenama Ehsan di Jualan Ehsan Rahmah (JER).

Ketua Penyelaras Jualan Perbadanan Kemajuan Pertanian Selangor (PKPS) Nazif Zulkifli berkata program itu menjadi platform mempromosi barang keluaran PKPS.

"Daging kambing dijual pada harga RM12 untuk pek 500 gram hingga 600 gram manakala susu segar RM3 untuk sebotol tetapi jika pelanggan beli empat botol mereka akan dapat harga promosi RM10.

"Kami cuba perkenalkan produk ini di JER dan nampaknya semakin mendapat sambutan, justeru sekiranya ada permintaan kita akan terus tawarkan produk ini di jualan murah," katanya pada 14 November.

## Tawar bantuan modal niaga

**SHAH ALAM** - Peniaga yang memerlukan bantuan modal untuk berniaga secara kecil-kecilan atau mengembangkan perniagaan boleh memohon skim pembiayaan di bawah Yayasan Hijrah Selangor (Hijrah).

Pembiayaan yang ditawarkan ialah skim i-Bisnes, Zero To Hero, Niaga Darul Ehsan (NaDI), Go Digital, i-Bermusim dan Pembangunan Usahawan India Selangor (Sitham).

Agensi itu memaklumkan di Facebook, pemohon boleh memuat turun maklumat pembiayaan menerusi [www.hijrahselangor.com/risalah-skim-hijrah.../](http://www.hijrahselangor.com/risalah-skim-hijrah.../) atau pautan [mikrokredit.selangor.gov.my/](http://mikrokredit.selangor.gov.my/)

Pemohon juga boleh menghubungi cawangan Hijrah berhampiran untuk mendapat maklumat lanjut berkaitan pembiayaan.

## Jaga warga emas walau beza agama

**KUALA SELANGOR** - Pasangan suami isteri berketurunan India membawa lelaki warga emas yang terlantar ke seorangan untuk tinggal bersama di rumah mereka sejak setahun lalu.

Meski berlainan agama, P Manimala, 56, dan suaminya D Maniam, 73, membawa Ali Mohamed, 66, yang menderita penyakit angin ahmar ke rumah mereka di Kampung Tanjung Siam di sini.

Sebelum ini, Ali yang empat anak perempuannya tinggal berjauhan menetap di rumah pusaka keluarga, kira-kira 30 meter daripada kediaman pasangan tersebut sejak lebih 20 tahun lalu.

Setiap hari, Manimala yang disahkan orang kurang upaya berikutkan masalah tulang belakangnya menuap makanan kepada Ali berikutan tangannya lemah selain turut memandikannya.

"Saya belikan abang Ali makanan

(untuk pastikan halal) dan kadang-kadang ada juga masak (seperti sayuran). Saya juga suap abang Ali makan (sebab) takut dia tercekik.

"Saya bawa abang Ali (menggunakan kerusi roda) pergi bilik air, siram-siram sikit dan lap badan dia. Saya muhi dia wangi setiap hari," kata Manimala pada 9 November.

Pasangan itu antara penerima baukar Jom Shopping yang diserah Penyelaras Dewan Undangan Negeri Bukit Melawati Thibban Subbramaniam sempena Deepavali. Ali pula menerima bantuan barang keperluan asas.

Keluarga yang berpendapatan isi rumah RM2,000 dan ke bawah menerima baukar Jom Shopping bernilai RM200 sempena perayaan Tahun Baru Cina, Hari Raya Aidilfitri dan Deepavali.

Pasangan yang tidak dikurnia seba-

rang anak itu juga menganggap per tolongan mereka tidak seberapa ber banding pengorbanan Ali ketika masih sihat.

"Abang Ali banyak membantu kami, tidak pernah berkira wang ringgit dan selalu pastikan kami selamat," kata Manimala yang turut membawa Ali bersiar-siar depan rumah ketika waktu lapang.

Cerita beliau, Ali kerap menghulur pelbagai sumbangan dan sering menziarahinya di hospital ketika Manimala terlibat nahas yang mengakibatkan tulang belakangnya patah tiga pada 2012.

"Kami orang miskin dan tiada kenderaan. Tetapi abang Ali sanggup sewakan kereta untuk bawa saya buat rawatan susulan di Hospital Klang," kata suri rumah itu lagi.

## Tingkat kemahiran pengasuh

# Kursus profesional asuh kanak-kanak

Oleh **SITI ROHAIZAH ZAINAL**

**SHAH ALAM** - Program Iltizam Penjagaan dan Pendidikan Awal Kanak-Kanak Selangor (IMPAK Selangor) akan dilaksanakan sepenuhnya tahun depan, kata EXCO pembangunan wanita.

Menurut Anfaal Saari, program tersebut menawarkan latihan atau kursus penjagaan kanak-kanak dengan menumpukan pengasuh yang mempunyai anak asuhan tidak melebihi empat orang.

"Program ini untuk manfaat pengasuh di rumah yang tidak berdaftar. Menerusi program ini, mereka dibantu

dengan kursus yang menawarkan kemahiran profesional.

"Pengasuh di rumah memerlukan kemahiran dalam penjagaan dan penting bagi memastikan kanak-kanak dijaga dengan kaedah yang betul, sekali gus menjaga keselamatan," katanya pada 9 November.

Bercakap dalam temu bual khas di pejabatnya di bangunan pentadbiran negeri, Anfaal berkata garis panduan pembukaan taska akan diwujudkan bagi memudahkan permohonan.

Menurut wakil rakyat Taman Temppler itu, kebanyakan permohonan



agak sukar berikut garis panduan-nya berlainan mengikut piyah berkuasa tempatan di daerah masing-masing.

"Permohonan lebih mudah dengan adanya garis panduan asal mematuhi peraturan demi keselamatan. Negeri mahu gunakan pendekatan mesra kerana setiap permohonan perlukan kos tinggi," katanya.

IMPAK Selangor adalah program kendalian Yayasan Warisan Anak Selangor untuk membantu pengasuh tidak berdaftar terutama di rumah mendapat lesen sebelum diberi laihan.

## 99 peratus peniaga patuhi harga

**SUBANG JAYA** - Hampir 99 peratus peniaga ayam di Selangor tidak meningkatkan harga susulan pengapungan harga bagi bahan mentah itu sejak 1 November.

Pengarah Kementerian Perdagangan Dalam Negeri dan Kos Sara Hidup (KPDN) negeri Mohd Zuhairi Mat Radey berkata tiada aduan rasmi diterima daripada pengguna berhubung perkara itu.

"Berdasarkan pemantauan selama sembilan hari, kami mendapat pematuhan adalah 99 peratus iaitu harga ayam yang dijual lebih murah berbanding RM9.40 sekilogram.

"Hanya ada satu atau dua premis yang jual melebihi harga. Mengenai aduan, saya sendiri terkejut kerana tidak ada langsung aduan daripada pengguna setakat ini," katanya.

Beliau meninjau barang atas sempena Skim Harga Maksimum Musim Perayaan Deepavali di pasar raya Mydin di sini pada 9 November. Turut hadir, EXCO Pengguna Datuk Rizam Ismail dan Pengarah Urusan Mydin Datuk Ameer Ali Mydin.

Sementara itu, Ameer menyambut baik pengapungan harga ayam selain berharap lebih banyak barang atas lain turut dikuat kuasa sama.

Menurut beliau, harga barang kawalan mudah dimanipulasi pihak tidak bertanggungjawab berbanding harga yang diapung kerana ia tertakluk kepada bekalan.

"Kalau boleh saya mahu apungkan harga untuk semua barang, secara perlahan-lahan sehingga lama-lama kita tidak perlu lagi skim kawalan. Hanya perlu dipantau sahaja."

"Kadang-kadang harga dikawal tetapi barang itu tiada bekalan. Kalau diapung, harga naik sedikit tetapi sekurang-kurangnya ada bekalan. Bekalan lebih penting berbanding harga," katanya.



Oleh NAZLI IBRAHIM  
Foto NUR ADIBAH AHMAD IZAM

**K**ETIKA ramai sibuk mencari kerja di kilang, Mohd Hafiz Nordin yang memiliki diploma kejuruteraan elektronik memilih untuk mencebur sektor perikanan dengan menternak ikan kolam.

Meski bidang tersebut tidak popular, lepasan Universiti Teknologi Malaysia itu tertarik saranan kerajaan untuk memperkuuh industri asas tani yang menyediakan pelbagai insentif.

Justeru, beliau membina empat kolam kanvas di tanah seluas seekar di Kampung Kubu Gajah, Sungai Buloh pada 2007. Hanya 500 kilogram keli dan tilapia dihasilkan sebulan sepanjang tahun pertama.

Kini, beliau yang berusia 39 tahun memiliki 397 kolam dengan kapasiti pengeluaran lebih 100 tan sebulan melalui syarikatnya Berkat Agro Food Sdn Bhd (ARC) di Bestari Jaya, Rawang.

Okttober lalu, Hafiz terpilih seorong daripada empat pemenang edisi ketiga Ikon Agro Selangor. Beliau menerima wang tunai dan bantuan peralatan bernilai RM10,000 yang disampaikan EXCO Pertanian Ir Izham Hashim.

"Saya mula dengan kosong tetapi bantuan Perbadanan Kemajuan Pertanian Selangor (PKPS) dan Jabatan Perikanan, alhamdulillah saya sampai tahap sekarang," katanya.

Pada mulanya, anak keempat daripada lima beradik itu membeli benih ikan menerusi iklan akhbar. Berbekal modal RM10,000, Hafiz membina kolam kanvas di tanah milik keluarganya. Hafiz kemudian mengikuti kursus anjuran PKPS dan Jabatan Perikanan Malaysia bagi menambah pengetahuan.

#### Ikuti bengkel

"Masa mula-mula, cuma belajar serba sedikit dengan pembekal benih dan kawan-kawan. Alhamdulillah hasil tahun pertama itu kira bolehlah hidup walaupun tak banyak.

"Setahun kemudian, saya ikuti banyak bengkel ternakan ikan. Di situ dapat bimbingan cara ternakan, benih ikan, usahawan, pemasaran dan jaringan kerja," katanya kepada Selangorkini.

Pada 2008, beliau menggunakan pinjaman Agrobank dan Majlis Amanah Rakyat untuk membina 26 kolam simen. Pengeluaran

# Ikon tani ternak 100 tan ikan



meningkat kepada dua hingga tiga tan sebulan.

Bagi mengukuhkan modal, Hafiz membawa rakan kongsi baharu Hazarul Hafzam pada 2009. Beliau menyewa tanah pada 2010 bagi membuka kolam di Sungai Tengi, Sungai Lui dan Sungai Garing. Pengeluaran ikan naik kepada 10 hingga 15 tan sebulan.

Selepas 10 tahun, beliau memindahkan operasi ke Bestari Jaya, Kuala Selangor di tanah seluas 150 ekar, lengkap prasarana yang dipajak menerusi PKPS. Di situ, pemberian dan ternakan ikan dibuat. Pusat jualan pula ditempatkan di Kampung Kubu Gajah.

Hafiz menggunakan teknologi bioflok supaya pengeluaran meningkat kepada 90 tan keli dan 10 tan tilapia setiap bulan. Kaedah itu manfaat kewujudan mikroorganisma bagi menambah baik ekosistem air dan mempercepat kadar tumbesaran selain meningkatkan kualiti ikan.

Suhu air, tahap keasidan, kealkalian dan lain-lain dipantau menggunakan teknologi moden bagi memastikan kualiti ikan seterusnya memberi pulangan terbaik.

"Kos makanan tinggi, kami belanja RM400,000 untuk kira-kira 100 tan palet sebulan. Melalui teknologi bioflok, dapat jimat makanan sebab ia hasilkan makanan semula jadi," katanya.

#### Ikan mati

Selain restoran dan kedai runcit, keli dan tilapia keluaran ARC mendapat permintaan luas apabila dipasarkan ke pasar borong, pasar basah, pusat jualan Ehsan PKPS dan pasar raya borong Sri Ternak.

Di sebalik rentetan kejayaan, bapa tiga anak itu tidak lepas berdepan cabaran khususnya perubahan cuaca mendadak. Fenomena itu boleh mengakibatkan benih ikan mati. Beliau pernah kerugian RM35,000 akibat benih ikan mati pada 2019.

"Bila berlaku perubahan cuaca mendadak, kandungan oksigen terlarut dalam air menurun. Bila kita kurangkan pemberian makan, keperluan oksigen untuk ikan akan menurun supaya dapat elak benih mati.

"Pernah rugi dekat RM35,000 tetapi kami belajar dengan pengalaman dan tunjuk ajar PKPS dan Jabatan Perikanan," katanya.

Dibantu lebih 50 pekerja, ARC turut menghasilkan kira-kira tujuh juta benih ikan sebulan untuk bekalan sendiri selain dijual kepada pengusaha ternakan ikan air tawar.

Sehingga kini, beliau ada 600 anak didik (mentee) di seluruh negara sama ada yang baharu atau telah lama berkecimpung dalam bidang ternakan ikan air tawar. Beliau juga membuka kelas bimbingan dengan usaha sama PKPS seliaan Jabatan Perikanan Negeri Selangor.

"Pasaran ikan air tawar cukup besar. Sebab itu, saya mampu bekalkan benih kepada pengusaha ternakan ikan air tawar ke seluruh negara.

"Ladang ternakan Bestari Jaya juga selalu terima pelawat seperti Thailand dan Papua New Guinea selain pusat zakat beberapa negeri yang bermintat menghantar asnaf belajar ternak ikan," katanya.

Pada masa ini, Hafiz giat membangunkan pasaran produk hiliran antaranya ikan keli berempah, ikan tilapia berempah, sate ikan, keli salai dan bebola ikan.



# Irama solidariti Gaza

Oleh ABDUL RAHIM SABRI

**G**aza sengsara dalam kemusnahan tanpa perikemanusiaan. Pemimpin dunia hanya berkata-kata tanpa aksi. Tiada doa dan irama dapat meredakan resah dan berang ini.

Sekurang-kurangnya 11,240 nyawa rakyat Gaza melayang. Seramai 4,506 kanak-kanak dan 3,027 wanita menjadi korban Zionis. Paling sedikit, 27,490 lagi termasuk 8,663 kanak-kanak cedera.

Orang kecil serata dunia berteriak menuntut keadilan buat Palestin. Solidariti juga berkumandang di media sosial termasuk lagu perjuangan dan ratapan.

Sepuluh nyanyian artis tempatan dan antarabangsa, termasuk bahasa Arab dan Inggeris, meluahkan pilu simpati berbaur semangat sebagai sokongan kepada seluruh warga Palestin.

## Intifada - Rabbani

Bermaksud ‘kebangkitan’, lagu nasyid rentak kontemporari ini disusun kumpulan KRU. Lirik pula ditulis B Nury, nama pena Sohibul Fadil Sabikin, penggerak muzik nasyid pada 1990-an.

Lagu ini dimuat dalam album dengan tajuk sama dan diterbit pada 2000, tahun Intifadah kedua dilancarkan selepas 1988. Menerusi album ini, Rabbani memenangi Album Nasyid Terbaik 2002 dalam Anugerah Industri Muzik (AIM) dan Lagu Nasyid Pilihan 2001 dalam Anugerah Era.

*Oh, semerbak harum, bingkisan an-Nur  
berterbangan tinggi ke Intifada  
oh, merentas misi risalah suci  
mewangikan taman yang dicemari*

## Untukmu Palestin - Raihan

Lagu dan lirik dihasilkan oleh anggota kumpulan itu sendiri. Ia dimuat bersama sembilan lagu lain dalam album Gema Alam, diterbitkan pada akhir 2002.

Dalam lirik lagu ini, Raihan mengajak umat Islam berdoa, berzikir dan bermunajat agar membebas dan merampas semula Palestin daripada genggaman Israel.

*Agar Palestin kita genggam semula  
agar Palestin bebas di tangan kita  
kembali damai, disirami air  
kebenaran al-Quran dan sunnah*

## Bebas Palestin - Rabbani, Inteam, Saujana & Nowseeheart

Lagu nasyid ini digubah oleh Nazrey Johani, penyanyi Raihan. Lirik susunan bersama pencipta lagu Frizdan Fizarahman. Lagu nyanyian empat kumpulan nasyid dimuat dalam album himpunan Gema Palestin, diterbitkan pada 2010.

Lagu ini membangkitkan semangat umat Islam agar berjihad dengan segala kemampuan bagi membebaskan Palestin daripada kekejaman Israel.

*Wahai para pencinta keadilan  
jangan gentar berjuang bersama  
kezaliman yang bermaharajalela  
kita gempur hingga ke hujungnya*

## Damai Yang Hilang - Nowseeheart

Dimuatkan dalam album Wahyu Pertama terbitan



1998, lagu ini bantu melonjak kumpulan ini di persada nasyid tempatan. Muziknya digubah Mujahid Ahmad dan lirik disusun Ito Lara dan Arab.

*Anak-anak kecil menggongangkan ibunya  
yang lemah longlai tak lagi bernyawa  
jeritan suara batinnya  
tak siapa mendengarnya*

## Balada Seorang Gadis Kecil – Zubir Ali

Lagu dan lirik lagu puisi ini dihasilkan oleh penggubah dan penyanyi terkenal Zubir Ali pada 1983. Lagu yang menyentuh tentang pembunuhan di kem pelarian Sabra dan Shatila di Beirut, Lubnan pada tahun 1982.

Lagu itu menobatkan Zubir sebagai Pencipta Lagu Terbaik pada Pesta Lagu Malaysia 1983.

*Pada suatu senja  
langit Shatila  
menyaksikan pembunuhan  
anak kecil dan wanita  
Munir ditembak  
penuh luka  
tapi ajalnya belum tiba  
kerna Tuhan mengasihi dia*

## Al-Quds Lana – Inteam

Lagu dan lirik dalam bahasa Arab digubah oleh Ibrahim Al-Ahmad. Manakala seni kata dalam bahasa Melayu ditulis oleh Fedtri Yahya.

*Wahai umat Islam bertakbirlah segera  
dan bawalah kain kafan dalam perjuangan  
andai kecundang di perang luka  
kan berganti sejuta*

## Hela-Hela Hey al-Qassam – Hijazz

Lagu ini dinyanyikan dalam bahasa Arab. Lagu yang mencetus semangat ini menceritakan tentang briged tentera Al-Qassam, sayap bersenjata Harakatul Muqawamah Islamiah (Hamas).

*Wahai tentera al-Qassam majulah!  
di belakang Muhammad al-Dhif  
tentera terkenal di seantero dunia  
bagaimana asah jalan kemuliaan*

## We Will Not Go Down (Song for Gaza) - Michael Heart

Lagu ini dihasilkan oleh ahli muzik pop rock kelahiran Syria itu 14 tahun lalu. Waktu itu, 2009, rakyat Gaza diserang Israel. Warganegara Amerika Syarikat ini dedikasikan lagu ini demi kemanusiaan dan hak asasi.

*We will not go down  
in the night, without a fight  
you can burn up our mosques and our homes and  
our schools  
but our spirit will never die  
we will not go down  
in Gaza tonight*

## Palestine Will be Free - Maher Zain

Diterbitkan dalam album pertamanya Thank You Allah pada 2009. Sangat popular di negara ini, Maher yang berdarah Lubnan seorang penyanyi R & B dan juga soul. Ia menceritakan tentang harapan Palestin akan dibebaskan pada suatu hari nanti.

*No mother, no father to wipe away my tears  
that's why I won't cry  
I feel scared but I won't show my fears  
I keep my head high  
deep in my heart I never have any doubt  
that Palestine tomorrow will be free  
Palestine tomorrow will be free*

## Mawtini – pelbagai penyanyi

Lagu ini diangkat daripada puisi Ibrahim Tuqan, penyair terkenal Palestin yang membangkitkan semangat menentang Britain pada 1930-an. Ia digubah pemuzik Lubnan Mohammad Flayfel.

Bermaksud “tanah airku”, Mawtini dianggap lagu tidak rasmi perjuangan rakyat Palestin sejak 1936 sehingga ia ditukar kepada lagu kebangsaan Fida'i pada 1996.

*Kami tidak akan minum demi elak kematian  
tidak akan khianat, seperti hamba, seperti  
hamba  
kami enggan, kami enggan  
penghinaan berlarutan, derita sepanjang hayat*

# Tekal kritik Zionis

Oleh AMIRUDIN SHARI

**S**eantero dunia disergah kecamuk. Perang Ukraine belumlah selesai. Konflik di Asia Timur dan pasifik belumlah reda dan yang terkini kezaliman rejim Zionis di Timur Tengah terhadap rakyat Palestin masih berterusan.

Kesemua konflik yang sedang menggelegak ini berpotensi memperlakukan ekonomi dunia. Sedangkan pada awal tahun ini, merujuk kepada laporan institusi seperti Bank Dunia, Tabung Kewangan Antarabangsa (IMF) dan Pertubuhan Kerjasama dan Pembangunan Ekonomi (OECD) iaitu ekonomi dunia memperlihatkan ciri-ciri pemulihan selepas pandemik Covid-19.

Laporan Bank Dunia The Global Economic Prospect bulan Jun 2023, Laporan OECD Economic Outlook Interim Report September 2023 dan Laporan IMF World Economic Outlook, diterbitkan bulan Oktober 2023 yang berjudul Navigating Global Divergences kesemuanya mengunjurkan pertumbuhan ekonomi dunia yang perlahan buat tahun 2024 iaitu di bawah 3.0 peratus, sekitar 2.7 peratus sehingga 2.9 peratus sahaja.

Laporan-laporan tersebut saya yakin diluncurkan dengan tidak mengambil kira perkembangan terkini di Palestin yang berpotensi meledak menjadi konflik serantau — sesuatu yang kita berharap tidak terjadi.

Waima demikian, sebagaimana yang dibentangkan oleh menteri kewangan ketika Belanjawan Madani 2024, pertumbuhan ekonomi negara yang didorong permintaan domestik sementara inflasi negara yang terkawal, keadaan pasaran buruh yang positif, rizab asing yang kukuh, lebihan akaun semasa dan tabungan negara yang tinggi serta kepesatan sektor kewangan dan pasaran modal yang teguh, terus mengekalkan momentum positif pertumbuhan ekonomi.

Walaupun berdepan kelembapan ekonomi dunia, Malaysia berjaya merekodkan pertumbuhan 4.2% pada separuh pertama 2023 dan dijangka mencatat sekitar 4% bagi keseluruhan 2023.

Manakala itu pertumbuhan ekonomi negeri Selangor pada tahun ini dijangka pada kadar 4.4%. Keadaan ini selari dengan pertumbuhan ekonomi Malaysia yang terkesan dengan ekonomi global.

Situasi tersebut bakal memberi kesan kepada sektor pembuatan Selangor, yang diunjurkan tumbuh dengan lebih perlahan pada kadar 1.4% pada tahun ini.

Pertumbuhan ekonomi negeri Selangor pada tahun ini dijangkakan dipacu terutamanya oleh sektor perkhidmatan iaitu sekitar 5.8% serta disokong oleh perbelanjaan domestik yang rancak.

## Perubahan dunia

Saya menjangkakan dunia akan semakin berpencar-pencar, semakin polarized, membuatkan ramai yang bingung, keliru, marah serta tidak tenteram.

Justeru adalah menjadi tanggungjawab kita, sebagai kerajaan, sebagai wakil kepada rakyat tatkala dunia berpencaran, untuk menyirnakan



kekaburuan, dengan izin tuan speaker, "to extinguish confusions" menyediakan sebuah negeri yang teduh buat rakyat negerinya berlindung dan bermastautin.

Tugas ini bukanlah mudah. Sementara kita menggarap dasar mendepani cabaran zaman, berhempsah pulas melaksanakan dasar dan polisi yang memberi manfaat kepada rakyat negeri Selangor ada yang menyebarkan kebencian serta pembohongan terutamanya melalui media sosial.

Segelintir puak politik yang tidak bertanggungjawab seharusnya belajar bagaimana aktivis seluruh dunia berbilang kaum dan kepercayaan menggembung pertembungan menentang naratif batil rejim Zionis.

Kita menyaksikan beberapa minggu ini aksi bersenjata ganas dan penghapusan kaum yang dilancarkan rejim Zionis bertembung dengan penentangan naratif anak muda di media sosial.

Anak muda dari Amerika Selatan, di Kuala Lumpur, di Jakarta, di London dan di Washington DC membantah keganasan Zionis dan mempertikaikan sikap berat sebelah Amerika Syarikat dan sekutunya.

Sementelahan itu menerusi media sosial juga, sarjana Muslim seumpama Imam Omar Suleiman dari Institut Yaqeen, Hasan Spiker, pengamal media seperti Khaled Beydoun dan Motaz Azaiza terus istiqamah mengkritik kezaliman rejim Zionis dan membangkitkan kesedaran terhadap kempen genocide rejim Zionis.

Kita menyaksikan kemenangan kemanusiaan ke atas kebatilan apabila klip-klip penerangan yang mempertikaikan penjajahan rejim Zionis oleh sarjana sejarah seperti Avi Shlaim, Cornel West, Ghassan Kanafani dan Noura Erakat banyak tersebar.

Selain itu wawancara Piers Morgan dengan Bassem Youssef juga mencerahkan ramai pihak terutamanya mereka yang baru mula memahami penjajahan Zionis ini. Wawancara pusingan pertama sudah mencapai 20 juta tontonan dan pusingan kedua pula sudah mencapai 9 juta penonton.

## Senjata media sosial

Tidak dapat dinafikan platform media sosial, seumpama X, TikTok, Facebook, WhatsApp, Instagram dan Telegram mampu menjadi wahana suara mahukan perubahan sebagaimana perlawanan menentang rejim Zionis, akan tetapi ia juga boleh dimanipulasi sebagai senjata, dengan izin, tuan speaker, 'weaponized', sebagai pelantar yang merosakkan, menyebarkan kebencian, keyakinan palsu yang menimbulkan polarisasi ataupun perpecahan serta penipuan.

Kini, konflik dan kekacauan yang mungkin terjadi beribu-ribu batu jauhnya terasa semakin dekat. Klip-klip ringkas menggantikan pengajian ilmu, kuliah, syarah dan telaah buku. Media sosial menyumbat fikiran kita dengan ribuan imej dan maklumat. Sedangkan maklumat tersebut belum tentu tepat bahkan ada yang sengaja memesongkan masyarakat serta bertujuan untuk menimbulkan huru-hara.

Oleh kerana itu, kita harus berwaspada untuk menghadam segala macam maklumat yang tersebar melalui media sosial. Bagaiakan menyikat rambut halus. Dengan izin tuan speaker untuk menemui 'fine balance' di antara kebebasan bersuara dan kemungkinan anarki atau kekacauan.

Justeru Kerajaan Negeri seiring dengan Kerajaan Pusat beristiqamah untuk kekal ligat memacu kemajuan dan memastikan dasar-dasar Kerajaan Negeri seumpama Belanjawan Negeri 2024 ini menumpukan usaha memperteguhkan Perpaduan dan keharmonian rakyat negeri Selangor.

Alhamdulillah, syukur ke hadrat Allah SWT kerana kedudukan kewangan Kerajaan Negeri Selangor melalui Kumpulan Wang Disatukan pada tahun 2022 adalah kukuh dan stabil. Sehingga 31 Disember 2022, rizab Kumpulan Wang Disatukan Kerajaan Negeri Selangor yang terdiri daripada Akaun Hasil Disatukan dan Akaun Amanah Disatukan telah merekodkan sebanyak RM3.082.17 bilion. Bagi tahun 2023 ini, sehingga 9 November 2023, jumlah agregat terkumpul Kumpulan Wang Disatukan Kerajaan Negeri terus kukuh dan stabil apabila merekodkan peningkatan sebanyak RM631.48 juta kepada RM3.713.65 bilion yang terdiri daripada Akaun Hasil Disatukan berjumlah RM1.499.97 bilion dan Akaun Amanah Disatukan berjumlah RM2.213.68 bilion.

Menggunakan pendekatan dan strategi perbelanjaan yang berkesan dan berhemah, prestasi kewangan Kerajaan Negeri sehingga 9 November 2023 telah merekodkan lebihan kewangan sebanyak RM427.25 juta. Secara spesifiknya, kutipan hasil Negeri sehingga 9 November 2023 yang telah direkodkan berjumlah RM2.405.09 bilion dan telah digunakan sebanyak 85.97 peratus atau RM1.113.27 bilion untuk perbelanjaan mengurus manakala sebanyak 72.05 peratus atau RM864.56 juta untuk perbelanjaan pembangunan.

Berdasarkan pencapaian prestasi dan kedudukan Kewangan Kerajaan Negeri sehingga 9 November 2023, Kerajaan Negeri optimis akan dapat mengelakkan unjuran defisit tahun 2023 daripada RM495 juta kepada angka yang lebih rendah, yang boleh ditampung oleh rizab sedia ada Kerajaan Negeri.

*Petikan ucapan Dato' Menteri Besar Dato' Seri Amirudin Shari ketika pembentangan Belanjawan Selangor 2024 pada 10 November 2023 di Dewan Negeri.*



Petugas media membuat laporan pembentangan belanjawan 2024 di luar Dewan Negeri Selangor, Shah Alam




Amirudin membentangkan belanjawan bertajuk Selangor Mandiri: Memacu Kemajuan, Memicu Perpaduan



Dato' Menteri Besar menunjukkan buku Belanjawan Selangor 2024 di bangunan pentadbiran Kerajaan Negeri, Shah Alam



Ahli Dewan Negeri dari blok pembangkang tekun mendengar pembentangan belanjawan negeri



Kakitangan DNS menyaksikan pembentangan secara langsung menerusi platform media sosial Media Selangor



Kakitangan Perbadanan Kemajuan Negeri Selangor (PKNS) menonton pembentangan belanjawan di ibu pejabat PKNS, Shah Alam



Semua 56 Ahli Dewan Negeri termasuk 22 wakil pembangkang memberi perhatian ketika Amirudin membentangkan belanjawan negeri



Kakitangan Kumpulan Semesta Sdn Bhd mengikuti pembentangan belanjawan di pejabat mereka di Menara Bank Rakyat, Shah Alam

**BELANJAWAN Selangor 2024** menyediakan peruntukan keseluruhan berjumlah RM2.53 bilion iaitu RM1.33 bilion untuk perbelanjaan mengurus manakala RM1.2 bilion bagi pembangunan negeri.

Dibentang dalam Dewan Negeri Selangor (DNS) pada 10 November, Dato' Menteri Besar Dato' Seri Amirudin Sharri menjangka anggaran kutipan hasil pada tahun depan adalah RM2.2 bilion.

Pelbagai bantuan untuk segenap lapisan rakyat diperkenal atau ditambah baik dalam belanjawan bertema Selangor Mandiri: Memacu Kemajuan, Memicu Perpaduan yang mengandungi empat teras.

Teras itu ialah pemangkin pelaburan berkualiti dan menjana pendapatan tinggi, mengangkat pendidikan bestari dan menjamin alam sekitar lestari, menaungi kebajikan rakyat serta mengangkat kesatuan ummah.

Amirudin turut mengumumkan bantuan khas kewangan dua bulan setengah gaji. Sebulan dibayar 28 Disember ini dan setengah lagi pada Februari.

Jurufoto AHMAD ZAKKI JILAN, FIKRI YUSOF, NUR ADIBAH AHMAD IZAM, NAZIR KHAIRI dan RADIN WAZIR merakam sidang dewan dan orang awam yang mengikuti siaran langsung itu. Keterangan gambar oleh HAFIZAN TAIB.



Kakitangan KDEB Waste Management (KDEBWM) mengikuti siaran langsung di pejabat mereka di Menara Bank Rakyat, Shah Alam



Juruhasa rasmi dewan Tan Lee Bee menggunakan isyarat tangan untuk OKU pendengaran ketika pembentangan belanjawan



Mohd Asri Mat Zaki (kiri) dan Karim Hassan menonton pembentangan belanjawan ketika menunggu pelanggan di Kompleks PKNS, Shah Alam



Dato' Menteri Besar bersama barisan EXCO Kerajaan Negeri menuju ke bangunan DNS untuk pembentangan belanjawan



Sebelum pembentangan belanjawan, semua Ahli Dewan Negeri bersolidariti bersama rakyat Palestin dengan berdoa



Sidang media Dato' Menteri Besar selepas pembentangan belanjawan negeri di luar DNS, Shah Alam



Pemandu e-panggilan Khairul Lokman mengikuti pembentangan belanjawan menerusi telefon pintar di luar Kompleks PKNS, Shah Alam

# Tapisan psikologi rekrut tentera Israel



*Penyelidik di Universiti  
Teknologi Mara,  
**DR ZAMIR MOHYEDIN**  
seorang ahli fizik yang  
menulis lapan buku*

**S**ekali seumur hidup mesti kita pernah mendapat borang tinjauan yang meminta kita menjawab siri soalan berdasarkan skala 1 hingga 5. Menariknya, kaedah ini pernah digunakan suatu ketika dahulu di Israel di dalam pemilihan tentera. Selepas penubuhan Israel pada 1948, tentera Israel tidak begitu cekap dan tidak terurus.

Jika datangnya pertempuran, mereka berkecenderungan lari daripada pertempuran itu. Kadangkala ketua unit pun tidak bercakap bahasa yang sama dengan kebanyakan orang bawahannya.

Kita kena tahu pada masa itu orang Yahudi bukanlah bangsa yang berkongsi budaya dan bahasa yang sama. Seramai 730,000 orang Yahudi dari pelbagai negara masuk ke Israel pada 1953.

Semuanya mempunyai latar belakang bahasa dan budaya yang berbeza. Israel menghadapi masalah yang sangat serius – bagaimana mahu jadikan populasi majmuk ini menjadi kuasa tentera yang bersepada?

Masalah itu diselesaikan anggota tentera Israel berusia 21 tahun bernama Daniel Kahneman.

Kahneman nama besar dalam bidang psikologi. Lulusan doktor falsafah pada 1961 di Amerika Syarikat itu bersama rakannya Amos Tversky merumuskan pelbagai teori tentang penilaian dan bias manusia.

Hasil kerja mereka yang terkumpul telah menggagaskan idea besar dalam ekonomi iaitu teori prospek – penilaian terhadap untung dan rugi itu berbeza.

Kelakuan manusia dalam teori prospek ini membolehkan ia diguna pakai dalam pelbagai cabang seperti politik, insurans, pelaburan, ekonomi dan hubungan antarabangsa.

Daripada teori inilah Kahneman merangkul Hadiah Nobel Ekonomi pada 2002. Gagasan



ini mempengaruhi Richard Thaler yang pernah berkolaborasi dengan Kahneman bagi membentuk gagasan lain berkaitan dengan kelakuan manusia dalam ekonomi seperti kesan endowmen.

Richard Thaler turut memperoleh Hadiah Nobel Ekonomi pada 2017 kerana sumbangannya yang menghubungkan ekonomi dan psikologi, terutamanya dalam tindakan membuat keputusan dan penilaian manusia.

Justeru, bagaimana Kahneman menyelesaikan masalah tentera Israel?

Pada ketika itu, tiada sistem piawai untuk menentukan secara objektif siapa yang layak dan cekap menjadi tentera.

Tidak sangka dipertanggungjawab mengupaya tentera rejim Israel, Kahneman hanya mengikut intuisinya sendiri berdasarkan data sedia ada seperti fizikal tubuh badan dan ujian latihan yang dibuat.

Kerja Kahneman nampak mudah, tetapi masalah timbul apabila apa yang dinilai olehnya tidak selari dengan kecekapan tentera itu apabila berhadapan dengan kejadian sebenar. Dengan kata lain, askar yang dipilih tidak seperti yang dimahukan.

## Kesan Halo

Bagi mengelakkan perkara ini, sistem piawai yang lebih objektif kena ada. Jadi, Kahneman mereka bentuk satu ujian personaliti untuk merekrut askar dan susun rekrut berdasarkan personaliti.

Kahneman meletakkan beberapa ciri keupayaan bertempur seperti rasa bertanggungjawab, ketepatan masa, tahap bersosial, maskuliniti dan keupayaan untuk buat keputusan sendiri.

Dengan adanya sistem ini, tidak perlu lagi mana-mana penemuduga merekrut askar berdasarkan ciri rawak, tetapi ciri yang digariskan oleh Kahneman.

Namun, masalah lain pula timbul. Mungkin tiada masalah untuk sukat fizikal seseorang berdasarkan tinggi dan beratnya, tetapi bagaimana untuk menyukat rasa bertanggungjawab?

Bagaimana untuk menyukat tahap ketepatan masa seseorang?

Masalah lain pula, walaupun ujian personaliti ada objektifnya, penilaian manusia tidak objektif dan mudah dipengaruhi oleh pelbagai faktor seperti pengalaman, prejudis, keutamaan, ideologi, aspirasi dan sebagainya – dipanggil sebagai kesan Halo.

Misalnya, kadangkala kita menilai seseorang itu cerdik kerana dia kelihatan cantik dan kemas. Sedangkan, kecerdikan seseorang bukan diukur melalui paras rupa dan kekemasan. Kita mungkin sedar, tetapi bias ini sukar untuk dielakkan. Penilaian manusia sentiasa dipengaruhi oleh pelbagai faktor luar.

Walaupun ujian personaliti itu mempunyai sifat objektifnya (walaupun tidak sepenuhnya), penilaian manusia tidak objektif. Lebih-lebih lagi melibatkan perkara yang tidak boleh disukat.

Kahneman mengambil langkah untuk membuang penilaian manusia dalam proses merekrut askar dan bergantung pada statistik.

Penilaian manusia tidak boleh dipercayai. Kahneman teringat pada karya Paul Meehl yang berjudul Clinical versus Statistical Prediction yang menunjukkan statistik meramalkan apa yang terjadi pada pesakit neurotik lebih baik berbanding kaedah psikoanalisis.

## Pemarkahan Kahneman

Maka, Kahneman mereka bentuk senarai soalan yang sangat spesifik untuk membendung kesan Halo. Soalan itu tidak akan bertanya apa yang individu fikir mengenai dirinya, tetapi apakah kelakuan dan tindakannya apabila berhadapan dengan situasi tertentu.

Setiap soalan ini dinilai berdasarkan skala 1 hingga 5. Skala 1 misalnya merujuk “tidak pernah berlakuan seperti ini” dan skala 5 merujuk “kerap berlakuan seperti ini.”

Jika penemuduga menilai tahap sosial individu, penemuduga boleh bagi 5 untuk individu yang ada hubungan kuat dengan ramai orang dan bagi 1 untuk individu yang kerap mengasingkan diri. Tentera Israel dibentuk berdasarkan algoritma Kahneman.

Sistem baharu ini lebih objektif dan berkesan tetapi pada peringkat awal ramai penemuduga yang tidak bersetuju. Kahneman teringat ada orang cakap sistem ini membuatkan para penemuduga ini seperti robot.

Penemuduga rasa mereka berupaya menilai karakter seseorang, tetapi Kahneman tidak percayakan penilaian manusia yang penuh dengan bias.

Ujian yang diasaskan oleh Kahneman dapat menyelesaikan permasalahan pembentukan tentera Israel. Ia dapat meramalkan kebarangkalian sama ada individu itu berjaya menjalankan tugasnya ataupun tidak.

Ia dapat memberikan ramalan siapa yang berjaya sebagai pegawai biasa, pegawai elit ataupun tidak berjaya langsung. Ujian pemilihan tentera Israel ini dikenali sebagai Pemarkahan Kahneman (Kahneman Score) yang masih lagi digunakan sehingga ke hari ini.

Usaha Kahneman sebenarnya telah memberikan dampak yang besar kepada Israel dalam usaha negara itu untuk bermandiri.

# Rahmat kepelbagaian



**MARWAN BUKHARI A HAMID**  
ialah penulis dan penterjemah.  
Lulusan Universiti Yarmouk,  
Jordan dan Universiti  
Sains Islam Malaysia

**S**ifat keesaan tuhan memberi pelbagai implikasi kepada pemikiran dan kehidupan.

Salah satu implikasi tauhid atau keesaan tuhan ialah seluruh makhluk lain termasuk manusia bersifat berpasangan dan tunduk kepada ciri kepelbagaian.

Terdapat kepelbagaian di pelbagai peringkat termasuk penciptaan merangkumi warna, bentuk, saiz, bahasa, rupa dan sebagainya.

Firman Allah dalam surah al-Rum, ayat 22: "Di antara tanda yang membuktikan kekuasaan dan kebijaksanaan-Nya ialah kejadian langit dan bumi, perbezaan bahasa kamu dan warna kulit kamu. Sesungguhnya yang demikian itu mengandungi keterangan-keterangan bagi orang-orang yang berpengetahuan."

Selain itu, terdapat juga kepelbagaian dalam berakidah, pemikiran dan pendekatan berfikir. Kepelbagaian ini juga merupakan kehendak tuhan. Firman Allah dalam surah Hud, ayat 118-119:

"Kalaullah Tuhanmu (wahai Muhammad) menghendaki, tentulah Dia menjadikan umat manusia semuanya menurut agama yang satu. (Tetapi dia tidak berbuat demikian) dan kerana itulah mereka terus-menerus berselisihan. Tetapi orang-orang yang telah diberi rahmat oleh Tuhanmu, (mereka bersatu di dalam agama Allah); dan untuk (perselisihan dan rahmat) itulah Allah menjadikan manusia."

Menurut ulama terkemuka dari Iraq, Sheikh Dr 'Ali al-Qaradaghi dalam bukunya berjudul Islam Agama Rahmah, kepelbagaian ialah hukum alam (sunnatullah) yang merupakan kehendak Allah SWT sejak azali.

Berdasarkan ayat surah Hud itu juga, ia menunjukkan kepelbagaian sebagai satu tujuan penciptaan manusia secara keseluruhannya.

Maksud ayat ini, kalau Allah kehendaki, tentu Dia menjadikan seluruh manusia menganut agama yang sama.

Tapi Allah tidak berbuat demikian kerana dunia ini ialah tempat ujian buat manusia



Kepelbagaian juga boleh dilihat sebagai ujian. Kepelbagaian warna kulit sebagai ujian untuk manusia saling menghormati dan tidak menghina

untuk mencari jalan kebenaran dan mengikuti kebenaran.

## Beza pandangan

Oleh itu, manusia dikurniakan akal, diutuskan rasul dan diturunkan kitab suci sebagai panduan.

Malah, kiamat juga akan berlaku untuk memberi ganjaran kepada yang beriman dan berbuat kebaikan serta memberi hukuman kepada yang kufur dan melakukan kejahanan.

Manusia akan sentiasa berbeza pandangan dan pemikiran. Kepelbagaian pemikiran juga berlaku kerana manusia mempunyai tabiat dan keupayaan berbeza dalam berfikir.

Hal ini turut ditegaskan oleh Ibn Rushd dalam Fasl al-Maqal yang membahagikan tabiat dan keupayaan manusia dalam membenarkan sesuatu perkara kepada tiga.

Ada pendekatan yang sesuai untuk seluruh manusia, ada yang sesuai untuk kebanyakan manusia dan ada pula jalan khusus untuk golongan tertentu sahaja.

Disebabkan itu, kecenderungan, tabiat diri dan kesediaan ilmu manusia memberi kesan terhadap pendekatan yang diambilnya dalam berfikir dan beramal.

Berkenaan kepelbagaian bangsa dan kaum pula, Allah berfirman dalam surah al-Hujurat, ayat 13:

"Wahai umat manusia! Sesungguhnya Kami telah menciptakan kamu dari lelaki dan perempuan, serta Kami telah menjadikan kamu berbagai bangsa dan bersuku puak, supaya kamu berkenal-kenalan (dan beramah mesra antara satu dengan yang lain). Sesungguhnya semulia-mulia kamu di sisi Allah ialah orang yang lebih taqwanya di antara kamu, (bukan yang lebih keturunan atau bangsanya). Sesungguhnya Allah Maha Mengetahui, lagi Maha Mendalam PengetahuanNya (akan keadaan dan amalan kamu)."

Ayat ini mempertegas lagi tentang satu aspek kepelbagaian iaitu berkaitan bangsa, suku dan puak.

Dari satu sudut, ayat ini menyebut tentang asal manusia daripada Adam dan Hawa, justeru menunjukkan setiap manusia adalah sama.

## Hikmah ujian

Dari sudut yang lain, dijelaskan hikmah kepelbagaian bangsa iaitu agar manusia saling mengenali.

Seterusnya, kehidupan manusia bukan sekadar untuk saling mengenali sesama mereka tetapi juga demi meneruskan perjalanan mengenali tuhan mereka iaitu Allah dan bertakwa kepada-Nya kerana itulah semulia-mulia manusia di sisi Allah.

Kepelbagaian juga boleh dilihat sebagai ujian. Kepelbagaian warna kulit sebagai ujian untuk manusia saling menghormati dan tidak menghina.

Kepelbagaian bahasa sebagai ujian untuk manusia saling belajar dan bertukar-tukar ilmu.

Kepelbagaian tamadun sebagai ujian untuk manusia mengiktiraf kebaikan masing-masing, bekerjasama memakmurkan bumi dan tidak mengutamakan pertembungan yang merugikan.

Kepelbagaian keupayaan manusia dalam ilmu, pemikiran dan fizikal sebagai ujian kepada manusia untuk saling membantu antara satu sama lain demi mencapai kejayaan hidup, bukannya yang kuat dan berilmu membuli yang lemah dan tidak berilmu.

Dalam masa sama, kepelbagaian tidak bermaksud manusia tidak boleh bersatu terutama dalam hal-hal yang melibatkan kebaikan bersama dan sejagat.

Maksudnya, kepelbagaian yang sihat itu seharusnya dalam bingkai kesatuan.

Ada masanya kesatuan keimanan sebagai sesama muslim kerana akhirnya kita berkongsi rukun iman yang sama dan rukun Islam yang sama.

Ini dinamakan sebagai persaudaraan keimanan. Pada masa lain pula mungkin kesatuan yang lebih luas kerana kita memiliki persaudaraan kemanusiaan walau berbeza agama dan negara.

Sebagai muslim, kita perlu menerima realiti kepelbagaian.

Menerima tidak semestinya bersetuju dengan pihak yang berbeza dengan kita, tapi kita menerima dan sedia untuk berbeza dengan penuh bijaksana demi mencapai kebenaran, menegakkan kebaikan, memakmur bumi dan mengatasi kerosakan.



# Yang memagari Bulan

Oleh AZRIE IZHAM HAMZAH

Seakan nyawa tidak bermilai,  
bukankah mereka juga layak untuk hidup? – Bulan

Pagar berfungsi sebagai pelindung sekali gus pemisah di antara dunia luar dan ruang selamat bernama rumah. Pagar juga menjadi perangkap yang mengurung atau menyekat apa saja yang tidak sepatutnya berada dalam lingkungannya.

Menonton Pagari Bulan (2023) idea asal Ellyna Ahmad, arahan Raja Mukhriz Raja Ahmad memperkenalkan kita watak Bulan (Nazeera Sardi) yang dipagari kegetiran pendudukan Jepun di Tanah Melayu, atau lebih tepat, negeri Kelantan. Bulan menerusi warkah peninggalannya mengajak kita untuk kembali meneroka sudut pandang pertentangan wanita di kancang peperangan.

Di permulaan, kita disajikan dengan momen pendaratan tentera Jepun di Pantai Sabak. Pantai ini cukup ikonik sebagai medan pertempuran pertama tentera Jepun di Tanah Melayu. Inggeris bersama-sama penduduk tempatan telah memagari pantai dengan benteng berupa batu-batu besar bagi menghalang kemaraan musuh (Jepun) dari laut.

Bulan yang penuh rasa ingin tahu, memanjat sendiri benteng batu menyaksikan gerombolan tentera Jepun yang sudah menguasai kawasan pantai. Di sinilah, keberanian Bulan buat pertama kalinya ditonjolkan. Bulan dalam babak ini, berdiri di atas benteng yang paling tinggi dan menghamburkan kata-kata penuh amarah menghalau tentera Jepun sehingga Kuzawa (Alvin Ong) menyifatkan Bulan sebagai ‘bunga liar’ yang berani.

## Ayah yang memagari Bulan

Selagi Bulan ada, aku kena ada – Pak Mail

Sebagai satu-satunya lelaki dalam keluarga, Pak Mail (Wan Azli Wan Jusoh) sering dihimpit kebimbangan jika sebarang malapetaka menimpanya. Pak Mail awal-awal lagi mengasuh dan ‘memagari’ Bulan, anak sulung yang menjadi harapan keluarga dalam apa jua situasi yang berlaku.

Seawal babak kredit awal, Bulan digambarkan sebagai seorang wanita pemberani. Bulan cekap dengan selok belok di hutan dan mahir memburu dengan menggunakan senapang. Bulan juga mewarisi seni bela diri daripada Pak Mail dan bijaksana mengamalkannya dalam pelbagai situasi berdepan tentera Jepun yang mengancamnya.

Sebaik sahaja berita penangkapan Bulan dan adiknya, Kasih, tiba ke pengetahuan keluarga, Pak Mail tenang dan yakin bahawa Bulan berupaya untuk meneruskan kelangsungan hidupnya berbekalkan ilmu yang telah diperturunkan kepada Bulan.

## Regu yang setia

Biar mati semua... – Sui Li

Sui Li (Trisha Ooi), regu Bulan yang setia. Mereka terperangkap sebagai wanita penghibur di kem tentera Jepun yang dipagari kawat berduri. Sui Li dan Bulan menyaksikan sendiri

nasib yang menimpakan teman-teman yang cuba melawan kekejaman Jepun. Sui Li dan Bulan sepakat untuk bersabar dan menurut apa saja kemauan tentera Jepun kerana matlamat mereka sama; untuk bebas dan kembali ke pangkuhan keluarga.

Dalam act kedua, dinamika watak Sui Li semakin lancar. Sui Li yang pada awalnya naif, dan dilihat akur, menyerah dan ingin sentiasa menjadi pilihan pertama Kuzawa.

Apa yang dilakukan Sui Li adalah ‘reaction formation’; satu mekanisme bela diri (menurut Freud) yang menyembunyikan motif atau perasaan sebenar dengan menunjukkan tindakan dan ekspresi bertentangan dengan apa yang seharusnya ditonjolkan. Niat Sui Li hanya satu, untuk melindungi Bulan daripada diperlakukan dengan kejam oleh Kuzawa. Sui Li sanggup melakukan apa saja untuk memastikan maruah Bulan terus dipagari kesucian.

## Cinta yang memagari Bulan

Saya sayang sepenuh hati – Lettenan Miura

Pagari Bulan sebuah melodrama perang. Penonton sesekali dilegakan dengan babak Bulan-Miura (Aniq Durar), Lettenan Muda dari Okinawa. Bulan tidak sewenang-wenangnya menerima Miura dalam hidupnya.

Miura digambarkan dengan sangat ideal sebagai pelindung kerana prinsipnya yang mempertahankan kehormatan bangsa. Imej Miura yang menawarkan diri sebagai penyelamat dan penyelesai masalah ini akan menjadi lebih menarik jika Miura dipaparkan sebagai seorang leftenan yang berwibawa dan mahir dalam pertempuran jarak dekat.

Perbualan ‘pengenalan’ Bulan-Miura di dapur kem tentera yang dibatasi jeriji tingkap menggambarkan keterbukaan Bulan. Bulan masih berhati-hati untuk ‘membuka pagar’ kepercayaannya kepada sesiapa saja. Apatah lagi, seorang yang leluhurnya adalah bangsa penjajah.

Kepercayaan Bulan terhadap Miura terbina perlahan-lahan. Seperti pintu yang dibuka dengan penuh debar, menantikan apa atau siapa yang sedang menanti di dalam sebuah ruang yang asing.

Bulan akhirnya akur dan membenarkan Miura yang sebelum ini asing, masuk dan bersatu dengan dirinya. Bertitik tolak daripada penyatuan inilah, Bulan dan Miura berhasil menyelesaikan kemelut di dalam dan luar kawat berduri kem tentera.

## Empati di dalam pagar

Di sini, kamu bekerja, berbakti untuk Jepun yang memerintah sekarang – Momosan

Medan perang tidak selalu menjanjikan empati. Namun begitu, menerusi Pagari Bulan, kita diperkenalkan dengan watak Momosan (Chelsia Ng), seorang wanita penghibur Jepun yang diamanahkan menjaga kebajikan wanita penghibur dalam kalangan orang tempatan,

termasuk Bulan dan Sui Li.

Momosan menjunjung tinggi budaya Jepun dan setia berbusana tradisional sekalipun berada di tanah asing. Begitu juga taat setia Momosan kepada pemerintah Kuzawa. Momosan dalam pertemuan pertamanya dengan Bulan dan teman-teman yang ditahan tentera Jepun, berjanji agar mereka tidak akan dicederakan dan akan diberi layanan baik.

Seperti hujan monsun hujung Disember, empati Momosan hadir seakan rahmat kepada wanita dalam tahanan. Empati Momosan pastinya hadir setelah beliau menyaksikan sendiri kekejaman bangsanya terhadap wanita-wanita penghibur sebelum ini. Momosan merelakan dirinya terus terperangkap. Momosan tahu, satu-satunya jalan keluar baginya adalah kematian dirinya sendiri.

Momosan bertanggungjawab memastikan kesihatan wanita di dalam tahanan terjaga. Setiap kali tentera Jepun cuba menggasari wanita, Momosan akan menghalang tegas. Momosan, terbuka mendengar suara dan pendapat Bulan setiap kali timbul kesangsian terhadap sesuatu yang berlaku di dalam lingkungan pagar tentera.

## Yang memagari dirinya sendiri

Orang perempuan yang ada di sini,  
kena rampas dari keluarga – Bulan

Kata Bulan, sekiranya riwayatnya dibaca berkali-kali, begitulah kesakitan itu akan terus menghantui. Bulan perlu menapaki jalan berkerikil, setiap tapak pasti mencederakan. Tiada laluan sehalus pasir pantai bagi diri Bulan.

Bulan telah berjanji kepada ayahnya untuk terus hidup sebelum mereka dipertemukan semula di luar cengkaman kawat berduri. Bulan juga telah berjanji kepada Sui Li untuk sama-sama keluar dan kembali mengutip bahagia di bawah renyai hujan.

Bulan jelas dengan matlamatnya; keluar dan kembali ke pangkuhan keluarga dengan bermaruah.

Bulan yang muncul di setiap langit malam meninggalkan tanda; Bulan akan bersendiri, mengusung nyawa dan meneruskan hidup. Bulan perlu melindungi dirinya, tanpa berharap pada sesiapa pun. Bulan memagari dirinya sendiri.

Pagari Bulan menawarkan pengalaman sinematik yang memuaskan. Kebijaksanaan Raja Mukhriz menangani kerja penulisan Siti Jasmina Ibrahim terserlah menerusi kejayaan beliau ‘memagari’ kehormatan wanita di layar lebar. Di samping penceritaan yang menarik, Pagari Bulan mewakilkan simbol yang meninggalkan tanda dan makna mempesona seperti kita terpukau melihat bulan penuh di langit malam.

*Cerpen, esei dan sajak boleh diikuti pada setiap minggu menerusi pautan [selangorkini.my/category/renanca-bm/](http://selangorkini.my/category/renanca-bm/)*



Anwar beramah mesra bersama Putera Mahkota Arab Saudi Mohammed Salman (kiri) dan Presiden Palestin Mahmoud Abbas (kanan) dalam Sidang Kemuncak Tergempak Pertubuhan Kerjasama Islam kelapan di Riyadh, Arab Saudi pada 11 November. Foto BERNAMA

Sekat kekejaman berterusan Israel

# Desak gencatan senjata di Gaza

**SHAH ALAM** - Majlis Keselamatan Pertubuhan Bangsa-Bangsa Bersatu (UNSC) didesak menyegerakan gencatan senjata di Gaza dan menyekat Israel dari terus melanggar undang-undang antarabangsa.

Sidang Kemuncak Tergempak Islam dan Arab juga menggesa pengeputan terhadap Gaza ditamatkan selain membenarkan konvoi bantuan kemanusiaan Arab, Islam dan antarabangsa.

UNSC juga diseru meluluskan resolusi mengecam pengeboman hospital, menghalang perubatan, makanan dan bahan api serta memutuskan keperluan asas termasuk internet, lapor Bernama.

"Kami menekankan keperluan untuk menarik balik sekatan yang telah dikenakan Israel ke atas Semenanjung

Gaza selama bertahun-tahun lamanya," menurut kenyataan pada 12 November.

Kenyataan susulan sidang itu percaya semua negara di rantau itu tidak akan menikmati keamanan jika selagi rakyat Palestin belum mendapatkan kembali semua hak mereka yang dirampas Israel.

"Tidak bertindak dianggap sebagai persekongkolan yang membolehkan Israel meneruskan pencerobohan kejam yang membunuh orang tidak bersalah, kanak-kanak, orang tua, dan wanita, serta meranapkan bumi Gaza," menurut kenyataan itu lagi.

Perdana menteri dalam ucapannya turut menggesa negara anggota Liga Arab dan Pertubuhan Kerjasama Islam (OIC) menegaskan keperluan gencatan

senjata manakala bantuan kemanusiaan dipercepat.

Datuk Seri Anwar Ibrahim menjelaskan umat Islam mengharapkan hasil yang nyata dan tindakan konkret daripada sidang berkenaan yang berlangsung sehari di Riyadh, Arab Saudi.

Beliau menyeru negara anggota menggunakan rangkaian diplomatik secara strategik dalam setiap dialog semua peringkat sama ada dua hala atau pelbagai hala, serantau atau antarabangsa.

Sidang tergempak yang dihoskan Putera Mahkota Mohammed bin Salman yang juga perdana menteri Arab Saudi mengadakan pertemuan itu untuk membincangkan pencerobohan Israel ke atas Palestin.

# Skim gaji penjawat awam 2024

**SHAH ALAM** - Skim gaji baharu untuk penjawat awam akan diumum sebelum akhir tahun depan, kata Perdana Menteri Datuk Seri Anwar Ibrahim.

Beliau yang juga menteri kewangan berkata garis panduan akan dibuat sebelum akhir tahun atau suku pertama 2024 supaya skim itu dapat diumumkan sebe-

lum akhir tahun hadapan, lapor Bernama.

Katanya, tiada kajian menyeluruh mengenai skim tersebut dibuat sebelum ini tetapi kerajaan ketika ini giat menjayakannya melalui Kajian Sistem Saran Perkhidmatan Awam (SSPA).

"Dasar kita selama ini, ada kajian penyelarasan gaji setiap 10 tahun, ini

mencecah masuk ke tahun ke-12. Sebelum ini tiada kajian menyeluruh tetapi sekarang saya umumkan," katanya.

Anwar berkata demikian dalam majlis Anugerah Inovasi Perdana Sektor Awam 2023 anjuran Unit Pemodenan Tadbiran dan Perancangan Pengurusan Malaysia (Mampu)di Putrajaya pada 7 November.

## Tabung Haji kawal kos tunai haji

**SHAH ALAM** - Pemeterian perjanjian kontrak jangka panjang membabitkan pelbagai perkhidmatan di Arab Saudi antara usaha Tabung Haji (TH) bagi mengawal peningkatan kos menunaikan haji.

Menteri hal ehwal agama menjelaskan usaha itu dapat menetapkan harga untuk satu tempoh dan tidak naik setiap tahun kesan peraturan dan cukai baharu yang diperkenal Arab Saudi.

Menyatakan perkhidmatan itu antaranya penerbangan, penginapan dan sajian makanan, Dato' Setia Dr Mohd Na'im Mokhtar berkata peningkatan kos haji sukar dielak berikutan faktor luar kawalan.

"Ini termasuk kadar inflasi dan percuakaian di Arab Saudi, kadar tukaran ringgit Malaysia berbanding Saudi riyal dan dolar Amerika," katanya di Dewan Rakyat pada 8 November.

## Bantuan kedua Malaysia 20 tan

**SHAH ALAM** - Penghantaran kedua bantuan kemanusiaan sumbangan Malaysia untuk rakyat Palestin berlepas ke Lapangan Terbang Antarabangsa El-Arish, Mesir pada 11 November.

Pesawat kargo khas berlepas kira-kira 11 malam dari Lapangan Terbang Antarabangsa Kuala Lumpur di Sepang dengan membawa barang seberat 20 tan antaranya makanan, barang bayi serta perubatan.

Penghantaran berkenaan menjadikan bantuan yang telah dihantar Malaysia setakat ini mencecah 40 tan berikutan barang seberat 20 tan dihantar pada 3 November, lapor Bernama.

Baki barang 10 tan dijangka dihantar dalam penerbangan ketiga dalam masa terdekat.

Bantuan tersebut akan diserah kepada Persatuan Bulan Sabit Merah Mesir sebagai rakan kerjasama bagi membawa masuk bantuan ke Palestin melalui pintu sempadan Rafah-Gaza.

Majlis pelepasan penghantaran kedua dihadiri Timbalan Perdana Menteri Datuk Seri Fadillah Yusof.

## Bina empat lagi pusat warga emas

**SHAH ALAM** - Sebanyak 161 Pusat Aktiviti Warga Emas (Pawe) ditubuh dan masih beroperasi seluruh negara setakat Oktober, kata menteri pembangunan wanita, keluarga dan masyarakat.

Menjelaskan ada lebih 50,000 ahli terdiri pelbagai latar belakang, Datuk Seri Nancy Shukri berkata empat lagi pusat itu dibina di Perak, Sabah, Sarawak dan Terengganu pada tahun ini.

"Ia pusat bagi warga emas menjalankan kegiatan harian dan ia ditubuh melalui pembabitan masyarakat dan pertubuhan sukarela kebajikan dengan sokongan dana kerajaan," katanya.

## 22 produksi terima insentif RM2 juta

**SHAH ALAM** - Perbadanan Kemajuan Filem Nasional Malaysia (Finas) menyerahkan Insentif Tayangan Filem Cerek 2.0 kepada 22 produksi keseluruhan bernilai hampir RM2 juta.

Insentif itu bagi menggalakkan penerbit menghasilkan filem sekali gus menjana pembangunan industri filem melalui galakan kepada penggiat industri.

Ketua Pegawai Eksekutif Finas Datuk Azmir Saifuddin Mutalib menjelaskan syarikat tersebut menerbitkan 22 judul filem cereka yang berdaftar melalui Skim Wajib Tayang, lapor Bernama.

"Inisiatif ini boleh membantu penerbit di samping mendorong penggiat industri filem tanah air terus menghasilkan lebih banyak filem cereka," katanya.

Beliau menyampaikan inisiatif Kementerian Komunikasi dan Digital itu di Kuala Lumpur pada 14 November.

## 19,224 kes tipu dalam talian

**SHAH ALAM** - Sebanyak 19,224 kes jenayah dalam talian direkod antara Januari hingga September tahun ini, meningkat 23 peratus berbanding 15,659 kes dalam tempoh sama pada tahun lalu.

Timbalan Menteri Komunikasi dan Digital Teo Nie Ching berkata nilai kerugian bagi tempoh itu meningkat kepada RM687 juta atau 29 peratus berbanding tempoh sama, lapor Bernama.

Katanya, mangsa merangkumi pelbagai lapisan penduduk termasuk golongan profesional antaranya pensyarah, jurutera, doktor, ahli perniagaan, pesara dan warga emas.

Katanya, Suruhanjaya Komunikasi dan Multimedia menurunkan 4,013 akaun dan kandungan setakat 31 Oktober selain menyekat 1,764 laman sesawang penipuan.

## Bilangan penganggur turun lagi

**SHAH ALAM** - Bilangan penganggur turun 0.6 peratus kepada 573,700 orang pada September berbanding 577,300 orang pada bulan sebelumnya, menurut Jabatan Perangkaan Malaysia.

Ketua perangkawannya berkata kedudukan tenaga buruh pada September dalam aliran pertumbuhan positif, peningkatan kecil dalam bilangan pekerja manakala pe-

nganggur terus berkurangan.

Datuk Seri Dr Mohd Uzir Mahidin menambah bilangan itu bertambah pada September, meningkat bulan ke bulan kepada 16.95 juta orang berbanding 16.93 juta orang bulan sebelumnya.

"Kadar penyertaan tenaga buruh kekal 70.1 peratus seperti direkod pada Ogos 2023," katanya seperti dilapor Bernama dalam kenyataan pada

8 November.

Mohd Uzir juga menjelaskan bilangan penduduk bekerja bertambah pada September, meningkat sedikit dengan merekod 16.38 juta orang berbanding Ogos yang mencatatkan 16.35 juta orang.

Katanya, 75.3 peratus penduduk bekerja dalam kategori pekerja yang turut merekod peningkatan mencecah 12.33 juta orang pada September berbanding 12.32 juta orang pada bulan sebelumnya.



### Sedia dana RM5 juta

## Bantu peneroka terjejas banjir

**SHAH ALAM** - Peruntukan RM5 juta disediakan bagi membantu peneroka terjejas bencana termasuk banjir pada tahun ini, kata pengurus Lembaga Kemajuan Tanah Persekutuan (Felda).

Datuk Seri Ahmad Shabery Cheek berkata dana itu meliputi kerja naik taraf 80 pusat pemindahan sementara yang menampung 27,000 mangsa melibatkan 26 kawasan berisiko tinggi banjir.

Beliau menambah kerja yang dijalankan antaranya pemasangan paip, pemasangan tangki air tambahan, sewaan

generator serta kerja pembersihan am, lapor Bernama.

"Kerja naik taraf penting bagi memberi keselesaan kepada peneroka yang terlibat banjir sepanjang tempoh pemindahan," katanya di Felda Seberang Taylor di Chukai pada 11 November.

Ahmad Shabery menjelaskan 2,000 kit kesiapsiagaan juga disediakan untuk kegunaan sebelum, semasa dan selepas banjir mengandungi antaranya beg kalis air, lampu suluh dan barang asas.

Katanya, latihan juga disediakan ke-

pada petugas terdiri Jawatankuasa Banjir peringkat ibu pejabat, wilayah dan rancangan, pengurusan dan badan bukan kerajaan (NGO) Felda.

Beliau menambah Felda juga telah mengenal pasti 60 kawasan rancangan yang berisiko dilanda bah kali ini, 26 daripadanya dikelaskan sebagai kerap terjejas banjir.

Pada 6 November, Jabatan Meteorologi Malaysia menyatakan musim tengkujuh di Malaysia bermula pada 11 November hingga Mac depan.

## Jualan Madani dapat sambutan

**SHAH ALAM** - Penganjuran Jualan Agro Madani yang mengumpul nilai

jualan lebih RM60 juta memanfaat lebih tujuh juta isi rumah di seluruh negara setakat 29 Oktober.

Menurut kenyataan Kementerian Pertanian dan Keterjaminan Makanan pada 8 November, program tersebut disertai seramai 54,300 usahawan, lapor Bernama.

Jualan itu membantu pengeluar memasarkan produk terus kepada pengguna selain mengurangkan kos sara hidup melalui penjimatatan sehingga 30 peratus lebih rendah berbanding harga pasaran.

Sebanyak 3,569 lokasi penganjuran

## 3,752 berita palsu

**SHAH ALAM** - Sebanyak 75 kertas siasatan kes penyebaran berita palsu dan isu 3R (agama, kaum dan institusi diraja) dibuka setakat 1 November, kata timbalan menteri komunikasi dan digital.

Teo Nie Ching berkata sebanyak 45 kes selesai dan 30 lagi dalam siasatan polis, Jabatan Peguam Negara dan Suruhanjaya Komunikasi dan Multimedia Malaysia (SKMM).

"Dari 1 Januari hingga 31 Oktober, 3,752 kandungan berkaitan penyebaran berita palsu dan ucapan kebencian bersifat 3R diturunkan platform media sosial bawah Seksyen 233 Akta 588.

"Tindakan diambil berdasarkan aduan awam dan tindakan penurunan kandungan disusuli SKMM dengan kerjasama platform media sosial seperti TikTok, Facebook, Instagram, X dan YouTube," katanya.



**KERAJAAN NEGERI SELANGOR**  
**JABATAN PENGAIRIAN DAN SALIRAN NEGERI SELANGOR**

### KENYATAAN TENDER

Tender adalah dipelawa kepada kontraktor yang berdaftar dengan Lembaga Pembangunan Industri Pembinaan dan Pusat Khidmat Kontraktor/Kementerian Kewangan dalam kelas dan jenis pendaftaran yang berkaitan serta masih dibenarkan membuat tawaran buat masa ini bagi kerja/perkhidmatan berikut:

PEJABAT YANG MEMANGGIL TAWARAN	NOMBOR TENDER TAJUK PROJEK	TARAF	SYARAT PENDAFTARAN	TEMPAT & TARikh DOKUMEN MULAI DUAJU	HARGA DOKUMEN	TEMPAT, TARikh & WAKTU TENDER TUTUP
Bhg. Uruk Bahan dan Kontrak, JPS Negeri Selangor	JPS/N/SEL/SG/18/2023 (CP)	Terbuka	Berdaftar Dengan CIDB Memegang Perakuan Pendaftaran Kontraktor dan Sijil Perolehan Kerja Kerajaan. Gred: G4 Kategori: CE Penghususan: CE 21 & CE 36 Kontraktor juga hendaklah berdaftar dengan Unit Perancang Ekonomi Negeri Selangor (UPENS)	Kaunter Bhg. Uruk Bahan & Kontrak JPS Selangor, Tkt. 5, Blok Podium Selatan, Bangunan Sultan Salahuddin Abdul Aziz Shah, 40626 Shah Alam, Selangor. 27 <sup>th</sup> NOVEMBER 2023 hingga 18 <sup>th</sup> DISEMBER 2023	RM 140.00 Pengarrah Jabatan Pengairan Dan Saliran Negeri Selangor (Pembelian dokument tawaran secara Online di laman web <a href="https://tender.selangor.my/">https://tender.selangor.my/</a> )	Peti Tender. Bhg. Uruk Bahan & Kontrak JPS Selangor, Tkt. 5, Blok Podium Selatan, Bangunan Sultan Salahuddin Abdul Aziz Shah, 40626 Shah Alam, Selangor. 19 <sup>th</sup> DISEMBER 2023 (Selasa) Jam 12.00 tengahari

Taklimat dan Lawatan Tapak adalah **DIWAJIBKAN** pada 23<sup>rd</sup> November 2023 (Khamis) Jam 10.00 pagi bertempat di Dewan Kenanga, Pejabat Kerajaan Daerah Petaling, No. 1, Persiaran Atmosfera, Seksyen 15, 40150 Shah Alam, Selangor Darul Ehsan

Lawatan Tapak adalah **DIWAJIBKAN** kepada **PENAMA** di dalam Sijil Perakuan Pendaftaran Kontraktor (PPK), Sijil Perolehan Kerja Kerajaan (SPKK), PUKONSA, UPKU atau bagi pembekal yang berdaftar dengan Kementerian Kewangan. Hanya penama di Sijil Akuan pendaftaran syarikat yang boleh menghadiri taklimat. Syarikat **TIDAK BOLEH** mewakilkan pegawai selain daripada penama dalam PPK, SPKK, BPNU, PUKONSA atau Sijil Akuan Pendaftaran Syarikat, Kementerian Kewangan.

Dokumen Meja Tender boleh disemak dan dokumen tender boleh diperolehi di pejabat berkenaan pada waktu **9.00 pagi hingga 3.30 petang** sahaja. Salinan resit pembelian hendaklah dilampirkan semasa pengambilan dokumen tender. Sila patuhi SOP yang telah ditetapkan semasa proses pengambilan dokumen tender.

Dokumen tender akan dikeluarkan kepada wakil-wakil kontraktor yang sah sahaja. Untuk maksud ini wakil-wakil kontraktor hendaklah membawa **SIJIL ASAL PENDAFTARAN LEMBAH PEMBANGUNAN INDUSTRI PEMBINAAN, PUSAT KHIDMAT KONTRAKTOR/KEMENTERIAN KEWANGAN DAN PENDAFTARAN UPENS SERTA SIJIL TARAF BUMIPUTERA PKK** jika berkenaan dan **SALINAN** bagi sijil-sijil berkenaan semasa membeli dokumen tender.

Petender boleh menyemak Jadual Tender yang akan dipaparkan di dalam website Jabatan Pengairan Dan Saliran Negeri Selangor selewat-lewatnya Tujuh (7) hari dari tarikh tutup tender.



Mahmud (tengah) menyaksikan pertukaran dokumen perjanjian antara SIC yang diwakili Saharom (dua, kiri) bersama Pengarah Urusan RDA Ventures Raymond D'Cruz (dua, kanan) di ibu pejabat PKNS, Shah Alam pada 9 November. Foto HAFIZ OTHMAN

Nilai projek lebih RM1 bilion

# PKNS bangunkan tiga pusat data

Oleh NORRASYIDAH ARSHAD

**SHAH ALAM** - Perbadanan Kemajuan Negeri Selangor (PKNS) bekerjasama dengan syarikat dari Singapura, RDA Ventures Pte. Ltd bagi membangunkan tiga pusat data di Cyberjaya, Sepang.

Ketua pegawai eksekutifnya berkata projek mencecah RM1 bilion dikendalikan anak syarikat, Selangor Industrial Corporation (SIC) bagi memenuhi permintaan global seiring kepentingan industri berkenaan.

Jelas Dato' Mahmud Abbas, SIC akan bertanggungjawab menarik pelanggan termasuk syarikat luar negara manakala RDA Ventures menyediakan kepakaran pembinaan, selenggara serta pengoperasian.

## MPHS bandar paling mampan

**SHAH ALAM** - Majlis Perbandaran Hulu Selangor (MPHS) sekali lagi melakar sejarah apabila dinobat sebagai Bandar Paling Mampan 2023.

Pengiktirafan diberi kepada 12 pihak berkuasa tempatan (PBT) di Malaysia sempena sambutan Hari Perancangan Bandar Sedunia (HPBS) peringkat kebangsaan tahun ini.

Berlangsung di Kompleks Perbadanan Putrajaya pada 9 November,

"Pusat data ini dibangunkan di sebahagian 34 ekar tanah milik PKNS. Pembangunan dalam tempoh lapan tahun merangkumi tiga fasa dan dijangka berjalan pada suku pertama tahun depan.

"Inovasi terkini akan melengkapkan pusat ini selain menggunakan kecekapan tenaga optimum, reka bentuk tahan lasak, kos efektif dan pengurusan fasiliti yang boleh dipercayai," katanya pada 9 November.

Berucap pada majlis menandatangani memorandum perjanjian antara SIC dan RDA Ventures, Mahmud berkata pusat itu disesuaikan dengan kehendak pelanggan sesuai dengan keperluan semasa.

"Pusat juga dibangunkan dengan mengambil kira tenaga hijau serta reka bentuk mesra alam demi memastikan

alam sekitar terpelihara," katanya.

Ketua pegawai eksekutif SIC pula berkata usaha sama sekurang-kurangnya 30 tahun itu bakal menawarkan peluang kerja termasuk tenaga mahir dalam bidang elektronik, sains komputer, statistik dan pentadbiran.

Saharom Mohni berkata pusat tersebut akan disertai agensi besar antaranya Perbadanan Ekonomi Digital Malaysia (MDEC) dan Lembaga Pembangunan Pelaburan Malaysia (MIDA).

"Penyertaan pelbagai syarikat terkemuka termasuk luar negara turut bertujuan memastikan keselamatan maklumat dan data pelanggan terjamin.

"Pusat ini akan menjadi sejarah kepada SIC sebagai syarikat yang diberi mandat untuk mengendalikan Bandar Pintar di Selangor Cyber Valley," katanya.

majlis itu disempurnakan Ketua Setiausaha Kementerian Pembangunan Kerajaan Tempatan Datuk Wira M Noor Azman Taib.

"Tahniah kepada warga kerja MPHS serta penduduk Hulu Selangor dalam menyokong dan membantu menjadikan Hulu Selangor sebagai sebuah bandar mampan.

"Semoga status bandar mampan ini akan terus kekal untuk masa akan

datang," menurut MPHS di Facebook.

Hadir bagi menerima pengiktirafan itu ialah Yang Dipertua Muda Mohd Hasry Nor Mohd dan pengarah Jabatan Perancang Bandar serta pegawai-pegawai MPHS.

Pada 2022, MPHS meraih tempat kedua Anugerah Bandar Mampan Terbaik 2022 (Kategori Perbandaran). Tempat pertama diungguli Majlis Perbandaran Selayang.

## Kerjasama tanam 1,500 pokok buluh

**SHAH ALAM** - Majlis Perbandaran Hulu Selangor (MPHS) bekerjasama dengan UMW Corporation Sdn Bhd (UMW) bagi program penanaman 1,500 anak pokok buluh.

Program dua fasa sepanjang bulan ini bertujuan menyahut seruan Kerajaan Negeri dalam pembentangan Belanjawan Selangor 2024 untuk menanam 11 juta pokok menjelang 2026.

"Satu lawatan tapak dan sesi perbincangan bagi persediaan mengadakan program penanaman anak pokok buluh telah diadakan di UMW High Value Manufacturing Park, Serendah pada 10 November.

"Program cetusan idea Bahagian Pusat Setempat MPHS Julai lalu bakal dijayaikan melalui program tanggungjawab sosial korporat pihak UMW.

"Sebanyak 1,500 anak pokok buluh dicadang ditanam pada program dijadual antara pertengahan dan hujung November," menurut kenyataan MPHS di Facebook pada 13 November.

## Sedia 934 petak bazar Ramadan

**SHAH ALAM** - Majlis Perbandaran Ampang Jaya (MPAJ) membuka permohonan lesen dan permit sementara bazar Ramadan (PSBR) melibatkan 934 petak perniagaan meliputi 17 lokasi pada tahun depan.

MPAJ memaklumkan permohonan dan syarat lanjut boleh disemak dalam talian menerusi [intranet.mpaj.gov.my/penjaja/login.php](http://intranet.mpaj.gov.my/penjaja/login.php)

Pemilihan petak, bayaran serta cetakan lesen atau permit bazar Ramadan boleh dijalankan seawal 2 Disember melalui sistem yang sama.

Bagi jualan di lokasi selain petak bazar Ramadan ditetapkan, peniaga perlu membuat permohonan PSBR dan pemilihan tapak perlu bersesuaian serta tidak menimbulkan kacau ganggu.

## Perbaharui lesen sebelum 1 Januari

**SHAH ALAM** - Peniaga di kawasan pentadbiran Majlis Perbandaran Ampang Jaya (MPAJ) diminta perbaharui lesen perniagaan sebelum 1 Januari 2024 bagi mengelakkan kompaun maksimum RM1,000.

Pembaharuan lesen boleh dibuat dalam talian menerusi [icomm.mpaj.gov.my](http://icomm.mpaj.gov.my) (lesen premis perniagaan) atau melalui intranet [mpaj.gov.my/penjaja/login.php](http://mpaj.gov.my/penjaja/login.php) (lesen penjaja).

"Bagi memudahkan pemilik premis perniagaan dan penjaja, mereka boleh perbaharui lesen di galeri aras 4, Menara MPAJ sehingga 31 Disember 2023 (kecuali Sabtu, Ahad dan cuti umum).

"Kaunter turut dibuka di aras 1, pusat beli-belah Melawati sehingga Disember. Kaunter beroperasi pada jam 10 pagi hingga 5 petang (hari bekerja termasuk Sabtu dan Ahad minggu satu dan tiga sahaja)," katanya.

## KSSB bantu pelajar kurang mampu

**SHAH ALAM** - Kumpulan Semesta Sdn Bhd (KSSB) menyumbang RM11,000 bagi membantu 11 penuntut Pusat Pembangunan Kemahiran Teknikal Selangor (STDC) yang kurang berkemampuan.

Eksekutif Kanan Komunikasi Korporatnya Mohd Mirza Kamaruddin berkata bantuan kewangan RM1,000 setiap seorang bertujuan meringankan beban pelajar terbabit.

"Ini sebahagian daripada program tanggungjawab sosial korporat KSSB sebagai tanda prihatin terhadap kesusahan hidup mereka yang merupakan pelajar jurusan kejuruteraan elektrik."

"Diharap melalui pemberian sumbangan ini dapat dimanfaatkan mereka dengan sebaiknya terutama bagi membiayai kos pengajian di STDC," katanya pada 9 November.

## Kaji semula had kifayah asnaf

**SHAH ALAM** - Lembaga Zakat Selangor (LZS) mengkaji keperluan untuk menilai semula had kifayah dalam penentuan asnaf.

Timbalan Ketua Divisyen Operasi Agihan Asnafnya Md Yusmizan Yusuf berkata pihaknya prihatin dengan kenaikan kos hidup ketika ini yang turut dipengaruhi penyusutan nilai ringgit berbanding dolar Amerika Syarikat.

"Untuk yang terkini kami tengah dalam kajian untuk had kifayah yang baharu sebab di LZS sendiri ia akan disemak setiap tiga tahun. Peningkatan kos sara hidup dan keadaan ekonomi semasa sedang dalam kajian kami untuk had kifayah baharu," katanya seperti dilapor Bernama pada 7 November.

Pada masa ini, had kifayah semasa di Selangor berjumlah RM2,990 setiap keluarga yang baharu diumumkan tahun ini berdasarkan kajian dua tahun lepas.

## Menangi RM500 di pesta buku

**SHAH ALAM** - Hadiah wang tunai RM500 ditawarkan kepada sembilan pengunjung bertuah setiap hari di Pesta Buku Antarabangsa Selangor (SIBF) 2023, Disember ini.

Perbadanan Perpustakaan Awam Selangor (PPAS) memaklumkan ganjaran menerusi program cabutan bertuah itu antara tarikan dalam penganjuran tahun kedua SIBF.

"Jom sertai kami bermula 1 Disember hingga 10 Disember di Pusat Konvensyen Majlis Bandaraya Shah Alam mulai 9 pagi hingga 9 malam."

"Ada cabutan bertuah, jualan buku, diskon menarik, aktiviti, dan banyak lagi! Anda tidak mahu melepaskan peluang ini," katanya menerusi Facebook pada 8 November.

## RM34.25 juta bantuan tambahan

**SHAH ALAM** - Lembaga Zakat Selangor (LZS) mengagih Bantuan Khas Keperluan Hidup RM34.25 juta kepada 68,500 penerima, kata Timbalan Ketua Divisyen Operasi Agihan Asnaf Md Yusmizan Yusuf.

Beliau menjelaskan bantuan sekali bayar itu akan dikredit terus ke akaun penerima terdiri daripada asnaf fakir, miskin dan mualaf seluruh negeri sejak 1 November, lapor Bernama.

Katanya, kira-kira RM12.41 juta disalur kepada 24,823 asnaf fakir dan 39,239 asnaf miskin (RM19.62 juta) dan 4,438 asnaf mualaf (RM2.22 juta) sebagai tambahan bantuan sedia ada.

Beliau mengiringi Ketua Pegawai Operasi LZS Ahmad Fadhil Hassan menyerahkan bantuan berkenaan kepada Orang Besar Daerah Kuala Langat Dato' Mohamed Alhaj Tengku Harun di Masjid Al-

Falah Jenjarom.

LZS juga menyampaikan sumbangan kepada empat individu yang menerima bantuan pembinaan rumah baharu, baik pulih kediamaan serta bantuan perubatan berjumlah RM241,471.

Turut menerima sumbangan tiga masjid dan surau dalam Kuala Langat untuk kerja membaik pulih serta peralatan masjid bernilai RM223,000.

### Jais rancang pelbagai program agama

## Peruntukan Islam naik setiap tahun

Oleh NORRASYIDAH ARSHAD

**SHAH ALAM** - Peruntukan tinggi khusus kepada agama Islam pada tahun depan membuktikan pentadbiran negeri mahu kerohanian umat bergerak seiring kemajuan negeri.



Pengarah Jabatan Agama Islam Selangor (Jais) berkata program yang dirancang dalam belanjawan dapat memartabat syiar Islam, sekali gus memberi kesan besar

kepada ummah.

Menurut Dato' Mohd Shahzihan Ahmad, dana RM2 juta untuk pengurusan masjid jelas menyokong dasar Majlis Agama Islam Selangor selain RM1 juta untuk Akademi Literasi al-Quran yang dijalankan Jais.

"Banyak yang kita dapat. Dari Jais sendiri, kita bersyukur dengan pelbagai program dirancang sedari lahir hingga kematian. Banyak bantuan diberikan termasuk juga peringkat pendidikan. "Semuanya sesuai dengan fizikal Selangor sebagai negeri maju. Setiap ta-

hun peruntukan Islam meningkat dan tunjukkan kita utamakan agama serta menyokong usaha agensi tertentu," katanya pada 11 November.

Beliau berkata pembinaan kompleks Islam di Gombak selain rancangan penganjuran Festival Turath Islami ke seluruh daerah juga membantu pemanjangan agama umat Islam negeri ini.

"Usaha ini memberi kesan sangat baik kepada umat Islam. Ditambah lagi program lain seperti bantuan RM5 juta untuk Kelas Fardu Ain Integrasi (KAFAI) dan pembinaan asrama Selangor di Mesir," katanya.

## Tambah dana untuk mahasiswa

**SHAH ALAM** - Projek baik pulih infrastruktur Universiti Islam Selangor (UIS) yang bermula tahun depan memanfaatkan kira-kira 6,000 penuntut.

Rektornya Prof Madya Dato' Dr Mohd Farid Ravi Abdullah berkata sokongan dana Kerajaan Negeri itu menjamin keserasian pelajar sepanjang pembelajaran.

"Peruntukan yang diumum Kerajaan Negeri membolehkan pengurusan UIS membuat penambahan terhadap beberapa elemen bagi kemudahan mahasiswa dan mahasiswi secara ber-

peringkat.

"Ada keperluan untuk naik taraf prasarana memandangkan ada bangunan mencecah usia 23 tahun sekali gus menyediakan pembelajaran lebih selesa untuk pelajar," katanya pada 11 November.

Dr Mohd Farid menambah peruntukan tersebut mencerminkan komitmen membantu meringankan beban perbelanjaan IPT terbabit.

"Kita akan guna peruntukan untuk buat penambahan apa yang sudah

dirancang tahun depan. Mungkin kita tidak mampu baiki kesemuanya (kemudahan) tetapi sekurang-kurangnya sebahagian.

"Pada masa sama, kita ikhtiarkan peruntukan dalaman untuk menampung sebahagian pembaikan lain," katanya.

Dalam Belanjawan Negeri 2024, peruntukan RM9 juta disediakan bagi naik taraf, baik pulih dan tambah baik prasarana UIS, Universiti Selangor dan Pusat Pembangunan Kemahiran Teknikal Negeri Selangor.

## Perkasa institusi pengajian negeri

**SHAH ALAM** - Belanjawan Selangor 2024 yang mencakupi segenap aspek pendidikan termasuk pembangunan mahasiswa akan memperkasa keupayaan Universiti Selangor (Unisel) menyumbang pembinaan modal insan.

Naib presiden dan timbalan naib canselornya (pembangunan pelajar dan jaringan komuniti) berkata usaha berterusan ini perlu bagi memastikan Unisel berupaya menyumbang kepada bidang paksi penting.

"Bidang paksi penting termasuk pendidikan awal kanak-kanak, pengajaran bahasa Inggeris sebagai bahasa kedua (TESL), psikologi, sains kesihatan, pengurusan selain bidang tumpuan sedia ada iaitu sains dan teknologi.

"Terima kasih dan penghargaan buat Dato' Menteri Besar Dato' Seri Amirudin Shari atas Belanjawan Selangor 2024 yang ternyata turut memberi tumpuan kepada Unisel terutama terhadap fokus pembangunan

mahasiswa.

"Peruntukan projek naik taraf, jaringan bersama industri, baucar buku, Bantuan Yuran Asas Universiti, basiswa dan lain-lain tentunya amat baik dan sangat membantu selaras usaha Unisel dalam proses transformasi sejak 2016," kata Prof Madya Dr Hamdan Mohd Salleh pada 12 November.

Beliau turut berharap Unisel dilibatkan dalam membantu Kerajaan Negeri menerusi penyelidikan dan aktiviti jaringan komuniti.



**TENANG...** Pemain pertahanan Harimau Malaya Sharul Nazeem Zulpakar (kanan) melayan peminat sempena jerayawara Bank Islam Malaysia Berhad di pusat beli-belah Aeon, Shah Alam pada 12 November. Turut hadir penjaga gol Sikh Izhan Nazrel Sikh Azman dan pemain tengah Nooa Laine (tengah). Foto Persatuan Bolasepak Malaysia

Penuhi keperluan atlet

# Persiap kontinjen ke SUKMA Sarawak

Oleh ZAREEF MUZAMMIL

**SHAH ALAM** - Majlis Sukan Negeri (MSN) Selangor akan memanfaatkan sepenuhnya peruntukan RM8 juta bagi mempersiap kontinjen menghadapi Sukan Malaysia (SUKMA) di Sarawak tahun depan.

Pengarah Eksekutifnya Mohamad Nizam Marjugi tekad memenuhi keperluan atlet supaya mereka mampu bersaing dengan negeri yang mempunyai peruntukan besar dan juara SUKMA 2023.

"Bagi pihak MSN Selangor saya me-

rakamkan setinggi-tinggi ucapan terima kasih kepada Kerajaan Negeri kerana cakna dan memberi perhatian terhadap pembangunan sukan negeri ini.

"Peruntukan akan digunakan sebaiknya untuk menghadapi SUKMA 2024. Walaupun 37 sukan dipertanding, tertinggi pernah dianjurkan, kita akan pastikan semua keperluan kontinjen dipenuhi," katanya pada 11 November.

Beliau juga menyambut baik kesinambungan inisiatif Roda Darul Ehsan (RiDE) sejak 2020 dengan peserta menerima tunai RM500 dan caruman Kumpulan Wang Simpanan Pekerja (KWSP) bernilai RM50.

"Ini jelas menggambarkan keprihatinan pentadbiran ini terhadap keperluan penunggang p-panggilan, sekali gus memastikan tiada golongan tertinggal daripada menikmati bantuan kerajaan," katanya.

Belanjawan Selangor 2024 yang dibentang pada 10 November turut memperuntuk RM10 juta bagi pasukan Selangor FC memburu gelaran juara Liga Super dan Piala Malaysia.

Selain itu, RiDE yang sebelum ini memfokuskan industri p-panggilan akan diperluas kepada pemandu e-panggilan membabitkan peruntukan RM1 juta.

## Giliran Aliff ke ONE Championship

**SHAH ALAM** - Atlet muay thai negara Ahmad Nor Iman Aliff Rakib berjaya mengharumkan nama Malaysia apabila meraih kontrak ONE Championship bernilai AS\$100,000 (RM469,000).

Kontrak lumayan diraih atlet dari Rantau Panjang, Kelantan itu selepas menewaskan petinju Iran Zolfaghari secara KO atau 'knock-out' di Bangkok, Thailand pada 10 November.

Kejayaan tersebut menjadikan Aliff atlet muay thai kedua negara meraih kontrak ONE Championship selepas Muhammad Johan Ghazali Zulfikar,

lapor Berita Harian.

Aliff yang juga anak bekas peninju negara Rakib Ahmad mengakui kejayaan meraih kontrak itu menjadi perkara paling gembira dalam kerjayanya.

"Tahun ini, jurulatih berjanji kepada saya bahawa kami akan mendapatkan kontrak bersama ONE Championship. Malam ini satu lagi kejayaan KO dan kami mendapatkannya.

"Malam ini (10 November) saya memenangi pertarungan dengan knock-out dan menerima kontrak bernilai AS\$100,000. Ini adalah saat paling

gembira dalam hidup saya," tulisnya di Instagram.

Kemenangan berkenaan menyaksikan pemenang pingat emas Sukan SEA 2021 dan juara dua tahun berturut-turut Kejohanan Muay Thai Remaja Dunia IFMA pada 2021 dan 2022 itu turut meraih bonus sebanyak RM46,900.

Bulan lalu, Johan yang berasal dari Sarawak menewaskan atlet Rusia Temirlan Bekmurzaev dalam acara ONE Friday Fight untuk meraih kontrak One Championship.

## Susun strategi hadapi musim 2024

**SHAH ALAM** - Selangor FC menyusun beberapa strategi bagi memastikan pasukan terbabit mampu meraih keputusan lebih baik pada tahun depan.

Ketua Pegawai Eksekutifnya Dr Johan Kamal Hamidon mengakui tempoh tiga atau empat bulan akan datang penting untuk persediaan mengharungi musim 2024 yang lebih panjang berbanding musim ini.

"Kita sedang menyusun perancangan tahun depan membabitkan perbelanjaan dan pendapatan serta giat berjumpa penaja. Kita perlu pastikan perancangan kita dapat berjalan tanpa sebarang gangguan pada tahun depan.

"Bajet lebih kurang sama tetapi kita akan mengharungi musim lebih panjang kerana selalunya kita ada 12 bulan tetapi ada 16 bulan untuk musim baharu termasuk pra musim dan rehat musim," katanya seperti dilapor Berita Harian pada 14 November.

## Peluang setara wakili skuad B-23

**SHAH ALAM** - Semua pemain bawah 23 tahun (B-23) berpeluang membarisi pasukan mengharungi perlawanan Piala Asia B-23 di Qatar pada pertengahan tahun depan.

Pengendali Juan Torres Garrido berkata tiada istilah 'anak emas' dan semua pemain perlu membuktikan keupayaan untuk menarung jersi kebangsaan.

"Ini adalah pasukan kebangsaan, jadi kalau ada pemain yang tidak menunjukkan persembahan terbaik, ada pemain lain yang akan menggantikan tempat mereka.

"Mereka perlu sentiasa fokus dan memanfaatkan peluang ini. Pemain harus pastikan yang mereka layak mendapat tempat apabila datang ke sini," katanya lapor Harian Metro pada 14 November.

## Atlet memanah mara ke Olimpik

**SHAH ALAM** - Pemanah wanita negara Ariana Nur Dania Zairi menempah tempat ke Sukan Olimpik Paris 2024 selepas memenangi Kejohanan Kelayakan Benua Asia di Bangkok, Thailand.

Sekalipun tidak meletakkan harapan tinggi, beliau memenangi emas dan meraih keseluruhan 649 mata untuk rekod bahu-ru kebangsaan bagi acara recurve wanita, lapor Harian Metro.

"Saya sangat tidak jangka dapat ke Olimpik (Paris 2024). Saya tidak letak sebarang harapan tetapi dapat pecah rekod kebangsaan dan slot Olimpik memang bonus besar untuk saya."

"Ia adalah penyertaan pertama di temasya terbesar itu jadi saya tak letak sasaran tinggi tapi akan berusaha membaiki rekod peribadi saya," katanya pada 14 November.



**MOHD KAMRI KAMARUDDIN**  
Bukit Antarabangsa

bersama masyarakat India  
sempena Deepavali di  
kawasan DUN beliau



**IR IZHAM HASHIM**  
Pandan Indah

menyampaikan barang  
keperluan asas kepada  
penduduk DUN beliau



**NG SUEE LIM**  
Sekinchan

bertemu peserta Jom  
Shopping perayaan di  
kawasan DUN beliau



**DR FAHMI NGAH**  
Seri Setia

mendengar penerangan  
persediaan musim  
tengkujuh di DUN beliau



**PAPPARAI DU VERAMAN**  
Banting

menghulur bantuan kepada  
mangsa banjir di Dewan Dato'  
Hormat Sri Cheeding, Kuala Langat



**DATUK JOHAN AZIZ**  
Dusun Tua

menghadiri taklimat kerja  
naik taraf dan penukaran  
paip di DUN beliau



**SYED AHMAD ALHADAD**  
Lembah Jaya

meninjau cerun bermasalah  
di Kampung Bukit Sungai  
Puteh, Ampang Jaya



**LIM YI WEI**  
Kampung Tunku

menyerahkan sumbangan  
Perkeso kepada penduduk  
kawasan DUN beliau

# PN puji program kebajikan, agama

**SHAH ALAM** - Ahli Dewan Negeri (ADN) Perikatan Nasional (PN) menyambut baik usaha pentadbiran negeri daripada segi kebajikan dan keagamaan dalam Belanjawan Selangor 2024.

ADN Sabak Sallehen Mukhyi menyifatkan peruntukan RM25 juta untuk membina kompleks Islam di Gombak Permai membangunkan lagi institusi ibadah masyarakat Islam di Selangor.

"Saya setuju pada dasar pembinaan agama, daripada sudut fizikal kita sudah ada pembangunan untuk umat Islam



beribadah dan melakukan pelbagai aktiviti kemasyarakatan.

"Namun, pembangunan institusi ibadah memerlukan tenaga pengajar terlatih. Jadi, perlu wujudkan sebuah pusat latihan sebagai institusi sarjana yang lahirkan ulama hebat," katanya.

Wakil rakyat Permatang Nurul Syazwani Noh pula berkata dana RM4 juta untuk pembangunan wanita dan pelbagai insentif lain menunjukkan pentadbiran negeri meneruskan tradisi membela rakyat.

Jangka siap awal 2024

# RM286,000 baik pulih dewan

Oleh SHEEDA FATHIL

**SHAH ALAM** - Sejumlah RM286,000 di-peruntuk bagi membaik pulih Dewan Komuniti Batu 11, Cheras, maklum Ahli Dewan Negeri Balakong.

Wayne Ong Chun Wei berkata peruntukan itu merupakan dana Kementerian Pembangunan Kerajaan Tempatan (KPKT) yang diselia Majlis Perbandaran Kajang (MPK).

"Dewan ini ditutup kira-kira dua

tahun selepas banjir besar pada 2021, banyak peralatan dan infrastruktur rosak selain semak samun kerana tidak diurus.

"Oleh itu, kita mengambil inisiatif memohon dana daripada KPKT bagi kerja baik pulih supaya ia berwajah baharu dan kembali dibuka kepada orang awam," katanya baru-baru ini.

Diusahakan sejak mantan ADN Balakong sebelum ini, Wayne bersyukur akhirnya usaha mereka berjaya dengan



sokongan pelbagai pihak.


"Kerja baik pulih dewan ini bermula minggu lepas dan dijangka siap awal tahun depan. Kita yakin selepas ini ramai memanfaatkan dewan ini memandangkan lokasinya strategik.

"Selain gelanggang badminton, orang awam terutama penduduk setempat boleh mengjuruk pelbagai majlis keraian di sini. Terima kasih KPKT dan MPK," ujarnya.

# Tubuh jawatankuasa khas tangani bah

**SHAH ALAM** - Satu jawatankuasa khas banjir membabitkan beberapa agensi akan ditubuh di Dewan Undangan Negeri (DUN) Kajang dalam masa terdekat.

Ahli Dewan Negeri Cheong Kian Young berkata antara agensi terlibat ialah Majlis Perbandaran Kajang (MPK), Jabatan Pengairan dan Saliran, Jabatan Kerja



Raya serta Pejabat Tanah dan Daerah.

"Buat masa ini, kerja-kerja menangani banjir kurang sistematis, namun dengan adanya jawatankuasa khas semua pihak akan bekerjasama dalam menyelesaikan isu tersebut."

"Saya jangka pertemuan bersama semua agensi itu akan diadakan selepas selesai sidang dewan supaya masalah banjir ditangani segera untuk

jangka masa panjang," katanya pada 10 November.

Tambah Kian Young, pihaknya juga telah mengadakan pertemuan bersama MPK bagi mencari penyelesaian kawasan yang sering dinaiki air di Saujana Impian, Jalan Reko, Kampung Bukit Badong dan Sungai Sekamat.

"Kita sentiasa siap sedia dan pastikan tindakan awal diambil supaya rakyat tidak terus terbeban dengan masalah ini. Sebab itu kita mahu jawatankuasa ini segera ditubuhkan," katanya.

# Mais tawar guaman syarie percuma

**SHAH ALAM** - Orang ramai khususnya penduduk Selangor boleh mendapatkan bantuan guaman syarie percuma yang disediakan Majlis Agama Islam Selangor (Mais).

Mais dalam kenyataan di Facebook berkata perkhidmatan itu membabitkan 16 jenis kes undang-undang syariah termasuk tuntutan pengesahan

lafaz cerai, permohonan pengesahan rujuk, tuntutan penceraian, tuntutan fasakh dan tuntutan pengesahan cerai taklik.

"Selain itu, tuntutan khuluk/tebus talaq, tuntutan sabitan nusyuz, permohonan wali hakim/am, tuntutan wali enggan/engkar, permohonan faraq nikah dan pengesahan nikah."

"Ia termasuk permohonan penge-sahtarafan anak dan permohonan/tuntutan kebenaran poligami (defendant sahaja).

"Tiga lagi perkhidmatan ialah tuntutan nafkah anak, tuntutan ubah perintah nafkah anak dan tuntutan tunggakan nafkah anak," katanya pada 13 November.

# Baiki sistem saliran elak banjir berulang

**SHAH ALAM** - Ahli Dewan Negeri Teratai mencadangkan sistem saliran di beberapa kawasannya diubah suai semula bagi mengelakkan banjir kilat berulang.

Yew Jia Haur berkata perkara berkenaan dimaklumkan kepada Jabatan Kejuruteraan Majlis Perbandaran Ampang Jaya untuk tindakan susulan khususnya di Jalan Bunga Kemboja dan Jalan Bunga Mawar, Taman Muda.

"Mengikut aduan yang diterima, banjir kilat sering berlaku di kawasan berkenaan kerana struktur longkang sedia ada tidak mampu menampung air yang melimpah sewaktu hujan lebat. Tambahan buat masa ini setiap hari kawasan sekitar sering dilanda hujan lebat," katanya di Facebook.

Beliau berkata kerja pemberian longkang di Jalan Bunga Kemboja selesai ketika mela-wat kawasan berkenaan pada 1 November.

# RM30,000 baik pulih kemudahan sekolah

**SHAH ALAM** - Pusat Khidmat Masyarakat Dewan Undangan Negeri (DUN) Kajang memperuntuk RM30,000 kepada beberapa sekolah daerah itu untuk membaiki prasara dan kemudahan pelajaran.

Wakil rakyatnya Cheong Kian Young ber-kata agihan kepada pengurusan Persatuan Ibu Bapa dan Guru (PIBG) serta individu dibuat bagi meringankan beban pihak sekolah.

"Bidang pendidikan antara agenda penting dan peruntukan ini merangkumi bantuan prasarana seperti kipas, tandas dan melanjutkan pengajian ke peringkat lebih tinggi."

"Keselesaan pelajar diutamakan kerana mereka pelapis masa depan negara. Se-moga sumbangan ini dapat beri sedikit keselesaan dan meringankan beban semua pihak," katanya pada 9 November.

Beliau berkata pihaknya turut berda-dang melaksanakan beberapa kursus ke-mahiran untuk belia tahun depan seperti membaiki komputer, telefon bimbit dan menjahit bagi menjana pendapatan.


# Pantau kawasan, siap siaga hadapi bah

**SHAH ALAM** - Majlis pemwakilan penduduk Zon 9 Majlis Bandaraya Shah Alam (MBSA) sering memantau lokasi berisiko banjir di Taman Sri Muda bagi mengelakkan kejadian dua tahun lalu berulang.

Ahli Majlis Ramu Nadarajan berkata pi-haknya juga membuat persediaan awal termasuk bekerjasama dengan pelbagai agensi bagi menghadapi sebarang kemungkinan ketika Monsun Timur Laut.

"Selain bekerjasama dengan 300 sukarelawan Team Selangor, MBSA juga sudah menyediakan pam air sementara di Persiaran Budiman."

"Kami juga dimaklumkan, pam air milik Jabatan Pengairan dan Saliran juga ber-fungsi dengan baik ketika ini," katanya.



## Medan bakat muda serlah bakat

**PETALING JAYA** - Kejohanan Golf Perbadanan Kemajuan Negeri Selangor (PKNS) Selangor Masters 2023 merupakan inisiatif negeri dalam menyerlahkan lagi bakat pemain tempatan untuk diangkat ke peringkat lebih tinggi.

Dato' Menteri Besar berkata kejohanan bermula 8 November itu menjadi medan untuk mereka beraksi bersama pemain profesional sekali gus menguji prestasi diri.

"Ini sebahagian sumbangan kita kepada sukan golf negara. Ini jadi peluang pemain untuk dapatkan kutipan masa dan rasai cabaran kerana ini penting untuk kualiti mereka."

"Tanpa kejohanan sebenar, pemain yang berkualiti ketika sesi latihan tidak dapat merasai pengalaman sebenar. Jadi ini bagai kan platform untuk uji kekuatan mereka," kata Dato' Seri Amirudin Shari pada 11 November.

Pemain Chinese Taipei Ho Yu-Cheng mengungguli kejohanan anjuran PKNS dan membawa pulang wang tunai AS\$30,625 (RM143,707) manakala jaguh profesional negara Ervin Chang dinobat pemain terbaik Malaysia.

## Buku terjemahan terbitan negeri laris

**SHAH ALAM** - Buku terbitan Kerajaan Negeri menerusi Inisiatif Buku Darul Ehsan (IBDE) terus mendapat sambutan sepanjang Oktober.

Naskhah berkenaan ialah Gelagat dan Ragam Orang Melayu, Tanpa Ampun: Tiga Tahun Diburu Jepun di Rimba Malaya dan Imam Al-Ghazali: Hayat, Jasa Ilmuwan Ulung dan Menghidupkan Ilmu Agama.

Buku berjudul Muhammad: Riwayat Hidup Berdasarkan Sumber Terawal karya Martin Lings atau nama Islamnya Abu Bakar Sirajuddin dihasilkan dengan kerjasama Perbadanan Perpustakaan Awam Selangor (PPAS) kekal naskhah paling laris dengan jualan mencapai 25,000 setakat ini.

## Hadiah RM25,000 kejohanan futsal

**SHAH ALAM** - Orang ramai berpeluang memenangi hadiah sehingga RM5,000 menerusi Kejohanan Futsal Piala Harapan 2023 di Republic of Futsal, Petaling Jaya pada 25 November.

Pengerusi dan pengarah projek berkata pertandingan melibatkan 48 pasukan itu diadakan secara liga dan kalah mati.

"Selain menggalakkan anak muda untuk amal gaya hidup sihat, objektif kejohanan juga untuk mengeratkan silaturahim melalui sukan," kata Nur Rahim Nasir pada 14 November.



Amirudin (dua, kanan) bersama pemenang Kejohanan Golf PKNS Selangor Masters 2023 di Kelab Golf Seri Selangor, Petaling Jaya pada 11 November. Turut hadir Setiausaha Kerajaan Negeri Dato' Haris Kasim (kanan) dan Ketua Pegawai Eksekutif PKNS Dato' Mahmud Abbas (dua, kiri). Foto FIKRI YUSOF

## Tammy akhiri kemarau emas 38 tahun

# Atlet wushu raih insentif tertinggi

**SHAH ALAM** - Atlet wushu Tammy Tan Hui Ling menerima insentif tertinggi berjumlah RM15,000 daripada Kementerian Pendidikan Tinggi (KPT) selepas menamatkan penantian 38 tahun negara meraih pingat emas pertama Malaysia pada temasya Sukan Universiti Dunia (Universiade) di Chengdu, China, Julai lepas.

Timbalan Menteri Datuk Mohammad Yusof Apdal berkata pencapaian itu membuktikan keberkesanannya perancangan dan pembangunan sukan di peringkat institusi pengajaran

tinggi (IPT).

Beliau berkata dasar pembangunan sukan institusi pengajaran tinggi yang seiring dengan dasar sukan negara berjaya mencapai objektif menerusi pencapaian atlet universiti di peringkat antarabangsa.

"Universiade kali ini menjadi sejarah baharu kepada penanda aras prestasi atlet IPT di pentas tertinggi dunia apabila kontinen negara memenangi pingat emas pertama setelah menanti selama 38 tahun sejak temasya pertama di Kobe, Jepun pada 1985.

"Saya amat berbangga kerana kejayaan pingat emas pertama ini seumpama kita telah berjaya memenangi pingat emas pertama di Olimpik kerana Universiade merupakan sukan Olimpik kepada atlet yang berada di IPT," katanya seperti dilapor Bernama pada 14 November.

KPT memperuntuk insentif RM35,500 kepada atlet IPT yang berjaya meraih pingat dan Malaysia membawa pulang satu emas, satu perak (sukan terjun) dan lima gangsa (wushu dan badminton).

## Tiket konsert Wings serendah RM95

**SHAH ALAM** - Kumpulan rock legenda Wings mengumumkan tiket harga Rahmah serendah RM95 sempena penganjuran konsert di Stadium Malawati Shah Alam pada 16 Disember.

Vokalisnya Datuk Awie berkata diskon 10 peratus turut ditawarkan

kepada penonton tujuh tahun ke atas, pemegang kad orang kurang upaya dan pelajar bagi kategori Rockzone, lapor Berita Harian.

Beliau menjelaskan harga itu dikenal bagi membolehkan segenap lapisan masyarakat dan peringkat usia

menikmati Konsert Wings The Rock Emperor – Kuala Lumpur Chapter.

"Bagi kami, harganya sangat berpututan supaya ibu bapa yang berhasrat membawa anak tidak rasa terbeban. Kami turut berikan diskaun tambahan 10 peratus," katanya pada 7 November.